

萬有文庫

第二集七百種

王雲五主編

明詩紀事

(一)

陳田輯

商務印書館發行

明詩紀事

(一)

陳田輯

國學基本叢書

光緒癸未，都門過夏，旅情蕭索，取明人詩閱之，遂有紀事之輯。至己亥，閱十七寒暑，錄詩幾四千家，分爲十籤。凡論明詩者，莫不謂盛於宏、正，極於嘉、隆，衰於公安、竟陵。余謂莫盛明初。若犁眉、海叟、子高、翠屏、朝宗、一山、吳四傑、粵五子、閩十子、會稽二肅、崇安二藍，以及草閣、南村、子英、子宜、虛白、子憲之流，以視宏、正、嘉、隆時，孰多孰少也。且明初詩家，各抒心得，雋旨名篇，自在流出，無前後七子相矜相軋之習。溫柔敦厚，詩教固如是也。長安旅食，剗劂爲艱，先以甲籤三十卷，質之同好。至此集以紀事爲名，無事可紀者，亦廣爲甄錄，冀以攬前哲之芳馥，爲後人之貽餉云爾。己亥秋杪，黔靈山樵陳田。

# 明詩紀事總目

甲籤三十卷

乙籤二十二卷

丙籤十二卷

丁籤十七卷

戊籤二十二卷

己籤二十卷

庚籤三十卷

辛籤三十四卷

壬籤十□卷闕出

癸籤十□卷闕出

# 明詩紀事甲籤目

## 卷一上

太祖一首

仁宗一首

英宗二首

孝宗一首

神宗一首

## 卷一下

祀社稷異壇同壝樂章二首

釋奠先師孔子樂章六首

祀先蠶樂章二首

雩祀雲門曲一首

王國祀仁祖樂章八首 宋濂

成祖五首

宣宗三首

憲宗一首

世宗一首

莊烈帝一首

禋享太廟樂章四首

宴饗九奏樂章七首

大禘樂章二首

特享九廟樂章五首

祭告天地樂章三首 梁寅

朝會樂章一首 顧祿

朝會樂章二首 王景

卷二上

周定王櫛四首

蜀獻王椿一首

甯獻王權二首

漢庶人高煦一首

周獻王有燉三首

秦康王志絜一首

楚憲王季垵二首

藩安王詮銖一首

秦簡王誠泳四首

肅靖王真淤四首

泯靖王彥汰一首

藩憲王胤移三首

德平榮順王胤樸一首

趙康王厚煜二首

蜀成王讓栩二首

武岡保康王顯槐一首

藩宣王恬焯二首

鎮康恭裕王恬焯三首

安慶端懿王恬燿二首

遼庶人憲燁一首

益莊王厚燁一首

藩定王理堯一首

靖安王新環一首

穀城王常濫一首

卷二下

朱安汎一首 周藩

朱華園一首 楚藩

朱觀樞一首

朱憲燮一首 遼藩

朱拱樞二首 甯藩

朱多烜八首

朱多燿一首

朱謀壽三首

朱謀境四首

朱謀燁一首

朱統欽一首

朱容重一首

朱胤柱一首

朱陸檸二首

朱承綵一首 齊藩

朱頤媿十三首

朱儼鏞一首

朱多燿五首

朱多燿一首

朱謀燁四首

朱謀堯二首

朱謀燁二首

朱統鈺一首

朱統喺一首

朱胤梢三首 瀋藩

朱胤枿一首

朱恬焯一首

朱理璫一首

朱理壩一首

朱碩爨四首 唐藩

朱常注一首 益藩

卷三

劉基四首

陶安十首

孫炎一首

宋訥十一首

卷四

宋濂三首

朱芾三首

張唯一首

朱理圻六首

朱理琬一首

朱效鏗一首

朱器封二首

朱慈愁一首 衡藩

汪廣洋四首

朱升一首

鮑恂五首

張以甯十首

答祿與權一首

史靖可一首

方徵一首



牛諒一首

卷五

王禕二首

詹同一首

樂韶鳳一首

錢用壬一首

卷六

胡翰一首

徐尊生二首

朱右八首

曾魯一首

李汶一首

王彝一首

貝瓊八首

朱夢炎一首

吳雲一首

吳沈一首

魏觀七首

危素二十五首

趙堦一首

謝徽二首

陶凱一首

朱廉一首

張孟兼一首

張宣三首

杜寅一首

呂復一首

李叔正一首

卷七

高啓七首 北郭十子

楊基四首

張羽十一首

卷八

徐賁三首

余堯臣一首

王行四首

宋克一首

呂敏二首

陳則一首 十子中尙有釋道衍見乙錄

唐肅十六首 會稽二廟

謝肅十四首

卷九

孫賈十一首 南園五子

黃哲五首

王佐三首

李德四首

趙介一首

卷十

林鴻十八首 閩十子

王恭二十首

王偁二十二首

高廷禮十首

陳亮二首

鄭定二首

王褒二首

唐泰二首

周玄三首

黃玄二首

卷十一

劉崧二十三首

許伯旅九首

曹容二首

邱民一首

韓守益一首

吳琳一首

趙俶一首

卷十二

吳伯宗一首

劉三吾二首

汪叡一首

朱善一首

龔穀二首

杜穀三首

吳源一首

張兌一首

王嘉會一首

全思誠一首

周澣一首

滕毅一首

楊訓文一首

李質二首

韓宜可一首

張籌一首

黃肅三首

劉紹十八首

卷十三

袁凱二十首

蘇伯衡七首

童冀二首

申屠衡二首

張昌一首

鮑頰一首

王立中四首

林公慶一首

張率一首

包尼授一首

涂穎三首

朱逢吉一首

金綱一首

涂幾一首

鄒矩一首

卷十四

徐一夔二首

周子諒一首

張翥二首

孫作二首

趙撝謙一首

錢宰三首

卷十五

朱同十三首

秦約三首

范準二首

方時舉三首

劉晟一首

吳彤二首

劉承直二首

林弼八首

陳世昌一首

瞿莊二首

張美和一首

揭軌六首

鄭潛五首

桂彥良二首

朱模一首

陳觀一首

賀守約二首

李徵一首

錢復亨二首

李思齊一首

卷十八

王蒙五首

陳汝言五首

王冕十四首

張紳十一首

莘野一首

吳植一首

芮麟一首

袁養福一首

卷十九

烏斯道五首

顧祿四首

浦源五首

馬琬一首

史謹二首

薛穆二首

虞堪二首

楊彝三首

邵誼一首

朱應辰一首

王履一首

宋璫三首

陳璧一首

盧熊三首

陶琛一首

卷二十

張適二十二首

潘仁四首

朱綝三首

楊子善三首

葉見泰二首

鄭元益一首

卷二十一

沐英一首

熊鼎一首

吳去疾一首

張辰一首

馬治五首

董紀四首

謝恭一首

郝經五首

遼昶八首

郭櫛一首

戴奎一首

郭奎十五首

夏焯一首

陶誼一首

谷宏一首

陳潛夫一首

沈應一首

蕭翀一首

白范一首

周榘一首

練高二首

史遷三首

吳文泰一首

程煜一首

吳斌四首

雷燧一首

葉子奇四首

卷二十二

胡奎四十一首

王翰八首

管時敏二十一首

林溫一首

貝翱一首

張璧一首

桂衡一首

黃榘一首

羅昭一首

曹惡一首

陸闔三首

陳南賓一首



卷二十三

陶宗儀十七首

蘭茂二首

唐貞一首

梁蘭五首

姚奩一首

韓奕四首

滑壽二首

林枝一首

卷二十四

李暉五首

蕭執三首

樓璉一首

丁晉六首

黎貞三首

蘭廷瑞二首

陳謨六首

唐桂芳七首

易恆二首

王賓一首

陶振一首

陸中四首

胡雲端一首

周昉二首

鄒奕一首

陸禧一首

高輝祖一首

陳維楨一首

范再一首

金居敬一首

胡安一首

韓廉一首

江敬弘一首

金夢巖一首

鄭昂一首

游莊一首

陳安一首

王中一首

顧協二首

謝林一首

卷二十五

袁華二十四首

徐達左三首

周南四首

林大同一首

殷奎五首

呂旭二首

朱昇一首

周后一首

陳燧一首

蕭岐一首

李唐一首

何彥修一首

陳謨一首

夏暉一首

張庸一首

俞韶美一首

王徽一首

周所立一首

林伯璟一首

卷二十六

張著二十一首

陳伯康八首

劉駟一首

鄭沂一首

李勝原一首

王時保一首

鄒說一首

富禮二首

卷二十七

劉鉅七首

郭鉅二首

王澤六首

王旬一首

戈鎬二首

俞貞木六首

薛倫一首

朱熙一首

李伯震一首

徐濟三首

吳昊一首

許敬軒一首

程袞一首

程彌壽一首

王興一首

陳甯一首

鄭洪一首

林旅一首

卷二十八

李延興二十七首

凌雲翰九首

鄭真三首

許繼十首

郭濬一首

劉剛一首

錢岳一首

劉渙六首

袁宗彥二首

卷二十九

王諫一首

王敬中一首

林谷嗣一首

馬德華一首

黃雋一首

歐陽貞一首

陳時舉一首

陳郊一首

卷三十

胡子祺一首

季應祈一首

林敏四首

劉仔肩五首

顧田一首

邱海一首

程用晦一首

章喆一首

葛貞一首

張庭蘭一首

任亨泰一首

俞永一首

宋杞一首

范宗暉一首

李伯葵二首

許中麗一首

林原縉一首

陳川一首

劉琮玉一首

徐顒二首

舒壽童一首

明詩紀事 甲籤目

蕭規一首

林右二首

危德華一首

周谷賓一首

游堅一首

邢沂二首

胡溫一首

黃褰二首

邵光祖一首

# 明詩紀事卷一上

貴陽陳田輯

## 甲籤

太祖一首

太祖姓朱氏諱元璋字國瑞濠州鍾離人元至正十一年辛卯起兵丁未稱吳元年戊申建元洪武在位三十一年崩葬孝陵有文集五十卷詩五卷

黃瑜雙槐歲鈔洪武八年秋八月上覽川流之不息隨尹程秋水賦言不契道乃親更爲之賦成召禁林羣臣觀之且曰卿等亦各擲賦以進宋濂率同列研精覃思鋪敘成章詣東黃閣次第投獻上皆親覽對復實品評於其間已而賜坐勅大官進天廚奇珍內臣行觴觴已上顧濂曰卿何不盡飲濂出跪奏曰臣荷陛下聖慈賜以醇酎敢不如詔第臣年衰邁恐不勝楛杓志不攝氣或愆於禮度無以上承寵光爾上曰卿姑試之濂卽席而飲將徹上復顧曰卿更宜釀一觴濂再起固辭上曰一觴豈解醉人乎卒飲之濂舉觴至口端又復瑟縮者三上笑曰男子何不慷慨爲對曰大威咫尺間不敢重有所瀆勉強一吸至盡上大悅濂顏面變赭頓覺精神遐深若行浮雲中上復笑曰卿宜自述一詩朕亦爲卿賦醉歌二奉御捧黃綾案進上揮翰如飛須臾成楚辭一章曰西風颯颯兮金張特會儒臣兮舉觴目蒼柳兮婁娜閉澄江兮水洋洋爲斯悅而再酌弄清波兮永光玉海誇而馨透泛瓊壘兮銀燦宋生微飲兮早醉忽周旋兮步驟踰踰美秋景兮共樂但有益於彼兮何傷濂既醉下筆欽傾

字不成行列。甫綴五韻。上遽召濂。至命編脩官朱右。電書以遺濂。遂諭濂曰。卿職之。以示子孫。非惟見朕寵愛卿。亦可見一時君臣道合。共樂太平之盛也。濂王拜叩首以謝。上更勅侍臣應制賦。醉學士歌者四人。考功監丞華克勤。給事中宋善。方徵。彭通。聞而續賦者五人。奏府長史林溫。太子正字桂彥良。翰林編脩王廔。張唯。典籍孫賈。彭與孫。皆吾廣人也。

黃佐翰林記。太祖嘗出御製詩文以示詞臣。太子正字桂彥良。卽於上前大聲誦之。琅然。左右驚愕。學士承旨詹同私戒之上。知之。謂曰。儒者事君。正當誠意。毋事矯揉也。

廖道南殿閣詞林記。丙午年六月。上禱雨鍾山。獲應。賦七言喜雨詩。命待制黃哲等賽和。已而諸將告捷。多令翰林諸臣應制賦。詩上親加品評。洪武十年十二月。上制十題。命典籍吳伯宗賦之。援筆立就。詞語峻潔。上嘉其才敏。賜織金錦衣。嘗幸清流關賦詩。命扈從儒臣和之。起居注劉季道有治定不教生縱逸。功成猶遺歷閭闔之句。上嘆賞曰。可謂安不忘危。賜以白金文綺。又起居注蔣子杰。應命卽物賦咏立成。上大悅。特寵賜和章。一日命羣儒撰象鶴文。吳府伴讀十驥。操觚立就。學士宋濂爲之進呈。上稱善。及日將南至。大祀於圜邸。上復命羣臣賦七言律十二韻。冠以三百言序。驥與黃翹先成。跪讀御榻前。上聽畢。加獎勵。命進學禁林云。

解縉春雨軒集。洪武二十有八年。北平永清衛之龍門。禾有異莖同穗之祥。今上皇帝遣使來進。羣臣上表賀。太祖高皇帝親御翰墨。爲詩一章。以賜今上皇帝。其詩首言創業之艱。天命之不易。除暴禁亂之師。撫民政治之略。中言天錫豐登之慶。史書垂示之嚴。明堂禋薦之重。末示謙沖戒謹之意。爲善不足之誠。大矜下民之惠。與民同樂之盛心。滋於言表。蓋不以嘉禾之祥。爲可矜。而以爲可懼。而思以自勉。聖不自聖。兢兢業業。足以垂訓於千萬年。今上皇帝服膺聖訓。念手澤之存。諷誦追維。不能自已。乃永樂三年。用摹勒於石。拓本裝治成軸。分賜諸王及近臣。於是臣縉亦得與賜焉。

楊慎藝林伐山。吾蜀解元王孝忠。鄉試賀平西對表。中有云。川四巴三。收彈丸黑子之地。傳一廖二。成大統函夏之天。傳一廖二。乃太祖御製平西蜀頌中。謂傅友德之功第一。廖永忠之功第二也。人咸服其博洽。



童穀碧里雜存。宋太史濂乞歸時御製詩二首。錢之云。白下開尊話別離。知君此後迹應稀。濂續云。臣身願作衡陽雁。一度秋風一度歸。上悅。賜白金纒幣文綺。曰。與汝作百歲衣也。自是歲一朝焉。

田按堯山堂外紀。洪武十年。宋學士景濂乞骸骨歸。華亭朱孟辨紀其事。作詩送之。城上春雲煖更飛。念卿此地迹應稀。臣身願作隨陽雁。一度秋來一度歸。據此。則又爲孟辨詩。而非太祖與濂安以也。詩亦小有異同。

周亮工閩小紀。林廷綱洪武初承太祖親擢吏科給事中。寵遇日隆。嘗侍遊江間殿。太祖首唱詩二句曰。江間小殿與雲齊。梁上新添燕子泥。公承旨足成三聯曰。雉尾曉開紅日近。龍衣春溼彩雲低。旌旗影裏貔貅息。斧鉞門前騏驎嘶。警筆詩成同拜舞。太平天子賜新照。後賜名恒忠。

王世貞藝苑卮言。高皇帝神武天授。生目不知書。既下集慶。始厭馬上。長篇短歌。操筆輻頎。有魏武樂府風。制詞質古。一洗駢偶之習。

王世貞弇山堂別集。草木子謂上有佳句云。烏啼紅樹裏。人在翠微中。天下誦之。又皇太子新月詩云。昨夜殿陵失釣鈎。何人移上碧雲頭。雖然未得團圓相。也有清光照九州。野史附之。謂爲太祖及懿文不享國之證。草木子乃元遺民。國初所著書。謂上者順帝也。皇太子者。愛猷識理達臘也。蓋以其不獲有天下。而在東宮。頗擅權。故記之耳。高帝集無此二句。

朱孟震續玉筍詩談。近有作道聽錄者。指黃巢咏菊。元稹王曉行之作。以爲高皇。宋人譏高宗養鶴詩。載葉氏草木子。而以爲武宗北狩。書非異聞。時非久遠。尙謬妄若此。况遠且僻哉。

田按明史藝文志。太祖文集五十卷。詩五卷。四庫著錄二十卷。自漢祖以馬上得天下。大風一歌。妙合音節。明祖起自布衣。與漢合符。御製篇章。炳爲巨集。野史所載。最爲繁雜。茲擇其可信者。著於編。以瞻一代之風尚焉。

## 題老子殿廟

廟古鴉昏集。遙瞻起敬心。路幽人迹杳。碑偃草叢深。度關先紫氣。去後永淪沈。惟有庭前樹。多年茂作林。

成祖五首

成祖諱棣。太祖四子。初封燕王。靖難兵入。革除建文年號。建元永樂。在位二十二年。崩葬長陵。有集。

翰林記。永樂四年二月。上視學。服皮弁。御宸翰。賦長詩。賜太子親王。祭酒。胡儼。司業。張智。坐講。文武三品以上。及翰林儒臣。皆賜坐以聽。講畢。賜茶。

何喬遠名山藏。文皇御製。條達宏遠。如萬騎千乘。馳驟植立於平沙大漠之中。

弇山堂別集。永樂五年。授交趾明經。甘澗祖等十一人。爲諒江等府同知。賜勅慰勉。仍賦詩一章各送之。沈德符野獲編。永樂十一年五月午節。車駕東苑觀擊毬射柳。皇太孫擊射連發皆中。上大喜。射畢。進皇太孫嘉勞之。因曰。今日華夷畢集。朕有一言。爾當思對之。曰。萬方玉帛風雲會。皇太孫卽叩頭對曰。一統山河日月明。上喜。賜名馬錦綺羅紗及番國布。因命儒臣賦詩。賜羣臣宴。

闕里孔子廟詩

巍巍元聖。古今之師。垂世立言。生民是資。天將木鐸。以教是畀。謂欲無言。示之者至。惟天爲高。惟道與參。惟地爲厚。惟德與含。生民以來。實曰未有。出類拔萃。難乎先後。示則不遠。日用攸趨。敦序有彝。遵於聖模。仰惟皇考。聖道實崇。禮樂治平。身底厥功。曰子祇述。詎敢或懈。聖緒丕承。儀憲永賴。巖巖泰山。魯邦所瞻。

新廟奕奕，飭祀有嚴。鼓鐘鏜鏜，珍馨夏擊。八音相宣，聖情怡懌。作我士類，世有才賢。佐我大明，於斯萬年。

田按明代御製闕里孔子廟碑文及時凡三見成祖此詩其開先也憲宗孝宗詩具後。

### 滿刺加鎮國山詩

西山鉅海中國通，輸天灌地億載同。沐日浴月光景融，兩崖露口草木濃。金花寶鈿生青紅，有國於茲民俗雍。王好善義思朝宗，願比內郡依華風。出入導從張蓋重，儀文揚襲禮虔恭。大書貞石表爾忠，爾國西山永鎮封。山君海伯翕扈從，皇考陟降在彼穹。後天監視久益隆，爾衆子孫萬福崇。

### 日本壽安鎮國山詩

日本有國鉅海東，舟航密邇華夏通。衣冠禮樂昭華風，服御綺繡考鼓鐘。食有鼎俎居有宮，語言文字皆順從。善俗殊異羯與戎，萬年景運當時雍。皇考在天靈感通，監觀海宇罔不恭。爾源道義能迪功，遠島微寇敢鞠凶。鼠竊蠅蟻潛其蹤，爾奉朕命搜捕窮。如雷如電飛蒙衝，絕港餘孽以火攻。焦流水上橫，復縱什伍伍禽奸凶。荷校屈肘衛以從，獻俘來庭口喁喁。彤庭左右誇精忠，願咨太史酬勳庸。有國鎮山宜錫封，惟爾善與山增崇。寵以銘詩貞石龔，萬世照耀扶桑紅。

### 淳泥長甯鎮國山詩

炎海之墟，淳泥所處。煦仁漸義，有順無违。悽悽賢王，惟化之慕。道以象譯，遙來奔赴。同其婦子，兄弟陪臣。

稽顙闕下有言以陳。謂君猶天。遺其禮樂。一視同仁。匪厚偏薄。顧茲鮮德。弗稱所云。浪舶風檣。實勞懇勤。稽古遠臣。順來怒赴。以躬或難。矧曰家室。王心亶誠。金石其堅。西南番長。疇與王賢。蟲蟲高山。以鎮王國。錢文於石。懋昭王德。王德克昭。王國攸甯。於萬斯年。仰我大明。

柯枝鎮國山詩

截彼高山。作鎮海邦。吐烟出雲。爲下國洪龐。時其雨暘。肅其煩熯。作彼豐穰。祛彼妖氛。庇於斯民。靡灾靡疹。室家胥慶。優游卒歲。山之嶄矣。海之深矣。勒此銘詩。相爲終始。

野獲編永樂三年。滿刺加國遣使入京。求封其山爲一國之鎮。上嘉之。命封其國之西山。爲鎮國山。上御製碑文。賜以銘詩。四年。日本國王源道義。捕海寇有功。賜白金千兩。織金彩色幣二百。綺繡衣六十件。銀茶壺三。銀盆四。及綺繡紗帳。衾褥。枕席。諸物。海船二隻。封其國山曰壽安鎮國之山。上親製碑文。賜以銘詩。六年。嗣淳泥國王遐旺還國。賜金鑲玉帶一金。帶一金百兩。銀三千兩。錦紗羅衾褥。帳幔器皿。及王母王叔有差。先遐旺父言蒙恩賜爵。國之境土。皆屬職方。而國有後山。封爲一國鎮。至長其千。又請。上命封長甯鎮國之山。御製碑文及銘詩。先是淳泥國王麻那惹加耶。乃率其妃弟妹男女陪臣來朝。上遣中官宴勞。所過諸郡設宴。比至上親享之。宴其妃於三公府。未幾。卒于會同館。上祭以禮。葬安德門外。賜諡曰恭順。命其子遐旺襲封。因有是請。又遣官行人送歸其國。十四年。封柯枝國王可赤里爲國王。并封其國中之山爲鎮國山。上親製碑文。系以詩。蓋封外國山者。凡四見。皆出睿製詩文。以柄耀夷裔。且詞旨樞密。斷非親草。解揚諸公所能辦。因思唐文皇兵力僅伸於漠北。而風於遠水一海夷。如文皇帝威德直被東南。古所未寶之國。屢轟宏文。昭回雲漢。其盛恐萬禩所未有也。

仁宗諱高熾。成祖長子。建元洪熙。在位一年。崩。葬獻陵。有御製文集二十卷。詩集二卷。

楊士奇三朝聖諭錄。永樂七年。贊善王汝玉。每日於文華後殿。道說賦詩之法。一日。殿下顧臣士奇曰。古人爲詩者。其高下優劣如何。對曰。詩所以言志。明良喜起之歌。南薰之詩。是唐虞之君之志。最爲尙矣。後來如漢高天風歌。唐太宗雪恥酬百王除兇報千古之作。則所尙者。霸力。皆非王道。漢武帝秋風辭。志氣已衰。如隋煬帝。陳後主所爲。則萬世之鑑戒也。如殿下於明道玩經之餘。欲娛意於文事。則兩漢詔令。亦可觀。非獨文詞高簡近古。其間亦有可裨益治道。如詩人無益之詩。不足爲也。殿下曰。太祖高皇帝。有詩集甚多。何爲詩不足爲。對曰。帝王之學。所重者不在作詩。太祖皇帝聖學之大者。在尙書注。諸書。作詩特其餘事。於今殿下之學。當致力於重且大者。其餘事可姑緩。殿下又曰。世之儒者亦作詩否。對曰。儒者鮮不作詩。然儒之品有高下。高者道德之儒。若記誦詞章。前輩君子。謂之俗儒。人主尤當致辨於此。

楊士奇東里文集。仁廟好文重士。樂善有誠。時節宴羣臣間。賜詩獎諭。悉識以東宮圖書。

尹直嘗齋瓊纒錄。仁廟在東宮時。嘗觀二內侍象戲。因命曾子榮先生應制。詩云。興盡計窮征戰罷。松陰花影滿殘枰。仁廟和云。等閒識得軍情事。一著功成見太平。君臣之器量見矣。

雙槐歲鈔。仁廟潛心經學。禮重宮寮。文傲歐陽。詩尙選體。名山藏。仁宗有典有則。模範雅訓。不啻學士。

### 冬至賜贊善徐好古

清朝盛文治。輔德資儒耆。念彼筋力倦。趨朝諒非宜。賦詩有佳致。納誨多良規。起予得深趣。歡懷浩無涯。新陽屆初復。況此承平時。酬勞有樽酒。庶以勞期頤。

朱彝尊靜志居詩話。獻陵天稟純明。雅志經術。東朝監國。命徐贊善善述。纂尙書直旨進講。詩成亦命善述改寫。今旨呼其字。

而不名。

阮元石渠隨筆。明仁宗楷書。今晨覽。卿爲余所改之詩。甚是丰采清雋。真有益於日新。但今卿年邁。恐輔子爲勞。似卿材百無一二。面談頓頓者。比比有之。卿無憚勞。獨成子業。惟望樂石之言。日甚一日。毋務犯臆。觸諱之慮。予今欲學作表。卿可一如詩題立例。具詩題與表題。間日封進。以口啄磨。皇太子致書贊善好古先生。

宣宗三首

宣宗諱瞻基。仁宗長子。建元宣德。在位十年。崩葬景陵。有御製文集四十四卷。詩集六卷。樂府一卷。

殿閣詞林記。宣宗喜爲詩。初卽位。起學士李時勉而任用之。一日幸文淵閣。賜諸學士飲。呼時勉謂曰。卿非朕安得飲此酒。時勉曰。首謝。他日賜遊東苑。上賜時勉酒。酌以御甌。時勉頓首辭曰。臣可與陛下同飲。不敢同器。上悅。命易以銀爵。既醉。上出御製詩俾賽之。

藝苑厄言。宣宗天縱神敏。長歌短章。下筆卽就。每南宮試。輒自草程式文曰。我不當會元及第耶。

弇山堂別集。宣廟命賜武侯薛祿等。率師築赤城等處。賜之詩。有出車命南仲。城齊惟山甫句。祿不曉南仲。山甫。以問少傅楊士奇。具言之。且曰。上以古之賢將待爾也。祿乃拊心感泣。

朱謀聖書史會要。宣宗時三楊。蹇。夏。諸賢輔政。泰交之際。常有御製詩歌。必親灑宸翰。賜之行雲流水。飛動筆端。真天藻也。朱謀聖書史會要。宣宗萬幾清暇。留神詞翰。山水人物。花草蟲。隨意所在。皆極精妙。

汪弼玉珊瑚網。章皇帝聖能天縱。一出自然。若化工之於萬物。因物賦形。不待矯揉。各遂生成。敬觀九鷺蘆雁二圖。柳絲鳥毛。細過於髮。一種生動之致。又居然寫意家神逸品。

招隱詩

天之生賢。道蘊厥身。幼學壯行。致君澤民。伊傅孔孟。皆古君子。孜孜行道。未嘗忘世。秦漢之衰。以退爲賢。絕類離羣。豈非遠天。嗟哉若人。於世奚補。區區百年。草木同腐。予嗣祖宗。統臨萬邦。求賢圖治。宵旰遑遑。羣才借來。布列在位。道行身尊。百世之貴。緬彼山林。豈無遐遺。往而不來。悠悠我思。漱石枕流。遠引高蹈。雖逸於身。而悖於道。卷阿之思。梧桐鳳凰。爾其幡然。予將爾揚。

減租詩

官租頗繁重。在昔蓋有因。而此服田者。本皆貧下民。耕作既勤勞。輸納亦苦辛。遂令衣食微。曷以贍其身。殷念惻予懷。故迹安得循。下詔減十三。行之四方均。先王視萬姓。有若父子親。茲惟重邦本。豈曰矜吾仁。  
實錄宣德七年三月庚申勅諭行在部院近年百姓稅糧遠運艱難官田糧重艱難尤甚自宣德七年爲始但係官田塘地稅糧不分古額近額悉依五年二月勅諭恩例減免中外該管官不許故違辛酉上退朝御左順門謂尙書胡濙曰朕昨以官田賦重百姓苦之詔減十之三以蘇民力嘗聞外間有言朝廷每下詔蠲租稅而戶部皆不準甚者文移戒約有司有勿以詔書爲詞之語若果然則是廢格詔言壅遏恩澤不使下流其咎若何今減租之令務在必行書曰民爲邦本本固邦甯有子曰百姓不足君孰與足卿等皆士人豈不知此朕昨有詩述此意卿當體念勿忘也

詠撒扇

湘浦烟霞交翠剡。溪花雨生香。掃卻人間炎暑。招回天上清涼。

梅純損齋備忘錄。宣廟詩多六言。如過史館云。蕩蕩堯光四表。巍巍舜德重華。祖考萬年垂統。乾坤六合爲家。上林春色。云山際雲。開曉色。林間鳥弄春音。物意皆含春意。天心允合吾心。二詩。今人家往往有石刻摹本。蓋石不在禁中。古人多得之。臣又嘗於故家。獲觀咏撒扇一首。與前二詩皆一視同仁氣象。而此一章。尤有克治之意。大抵皆以天地萬物爲一體。真帝王之言也。

毛奇齡西河詩話。舊宮中用撒扇。合竹骨二十餘。粘以藍紗。撒大片箔金。而以木柄之。可收可放。自司禮掌印。至管事牌子。皆得於夏月取用。明宣廟御製湘烟霞交翠六字詩。卽賦此物。

英宗二首

英宗諱祁鎮。宣宗長子。建元正統十四年北狩。弟郕王祁鈺奉皇太后令。卽皇帝位。改元景泰。尊帝爲太上皇帝。景泰元年。帝還自北。居南宮。七年。奪門復辟。改元天順。八年崩。葬裕陵。有御製詩文一卷。

雙槐歲鈔。北京自元建大都。已有所謂八景。不知何人品題。至我朝太宗文皇帝。因潛淵定天色。當時翰林諸儒。臣胡廣輩。作八景詩。傳播海內。天順辛巳端午節。英宗睿皇帝。賜文武侍臣以扇。有御製七言古詩十首。凡千一百二十首。卽前所謂八景。曰瓊島春雲。太液晴波。薊門煙樹。西山霽雪。居庸疊翠。玉泉垂虹。蘆花曉月。金臺夕照。而益以二景。則東郊時雨。南園秋風也。明年壬午。亦以端午賜扇。扇面御製清暑解愠二歌。大概言爲臣者。仰輔上德。俯恤民窮。助隆代天之績云爾。蓋國朝賜常朝官扇。竹骨銅釘鉸。書經傳格言。以示訓飭。越一二日。乃召大僚於內殿。賜象骨銀釘鉸扇。然但畫以物象。其有御製詩。惟此二年爲然。

田按裕陵御製詩文一冊。不見傳本。予檢廖道南楚紀。有賜襄憲王瞻塔。御製襄陽四景歌云。適情細繪棧頭編。洽歡滿泛宜。



城酒又云無窮風景峴山亭亭前數點峰巒青新葉滿林驚綠暗驕陽入戶延朱明又云賢王此日多清賞壑樹嶺明隔塵鞅瑤階瑩散水晶簾冰簾淨澗雲母帳又云滿貯寒瓜薦蒼玉細分雪藕飛銀絲又云飛螢草際流疏景華月騰輝星耿耿廣庭清露滴高槐越苾生涼湘簾冷又云鹿門山下行吟客冒冷尋香日幾回詞旨韶令可錄入摘句圖也

### 峴山歌賜襄王

於皇祖宗混八方兮裂土而封命同姓兮維予叔父王於襄兮襄多山川甲諸邦兮有巍者峴禹所荒兮垂千萬年歸我祖宗不可以爽兮惟澤日茂惟德日章燁有光兮保茲峴山樂無央兮子孫孫子永無疆兮

### 漢江歌賜襄王

漢江滔滔出蟠冢兮偉茲巨浸壯南邦兮萬有千里流無窮兮透透迤迤志必東兮於戲漢水殆與天地同始終兮

唐虞南楚紀天順四年英宗皇帝御製峴山漢水賦賜襄憲王以其有奉迎六飛恢復九宸諸疏故嘉賞焉粵稽諸古大舜卿雲之歌文王鳴鳳之詩太和氤氳溢于帝藻逮乎漢祖大風之詞霸心猶在唐宗興慶之詠王迹猶微惟吾皇祖親撰鍾山之賦及閱江詩英廟載製峴山之賦及漢水諸詠直可追軼虞休上媿姬姜豈漢唐諸君所可企及哉

### 憲宗一首

憲宗諱見濟初名見深英宗長子建元成化在位二十三年崩葬茂陵有詩集四卷

名山藏。憲宗時御翰墨。作爲詩賦。以賜大臣。諸司章奏。手自披閱。字畫差錯。亦蒙清問。臣下莫敢或欺。珊瑚網。憲廟御筆。皆神像。及金瓶金盤牡丹蘭菊梅竹之類。今觀山水小景。瀟灑出塵。宛然勝國氣韻。蓋聖能天縱。自各極其妙也。

### 闕里孔子廟詩

天生孔子。縱之爲聖。生知安行。仁義中正。師道興起。從游三千。往聖是繼。道統流傳。六經旣明。以詔後世。三綱五常。昭然不替。道德高厚。教化無窮。人極斯立。天地同功。生民以來。卓乎獨盛。允集大成。實天所命。有天下者。是尊是崇。曰性聖道。曷敢勿宗。顧予眇躬。承此大業。惟聖之謨。於心乃愜。用之爲治。以康兆民。聖澤流被。萬世聿新。報典之隆。尤在闕里。廟宇巍巍。于茲重美。文諸貞石。以光於前。木鐸遺響。於千萬年。

田按成化四年六月。闕里重修孔廟成。茂陵御製碑文。並系以詩。八月御製碑亭成。衍聖公孔弘緒具表謝。十二年祭酒周洪謨。請加孔廟籩豆。詔從之。增爲十二。遣學士商輅告文廟。王獻告於闕里。余檢吳寬匏菴家藏集。有曲阜重修夫子廟碑詩云。於赫皇明。建國十紀。文教誕敷。及遠自邇。明聖得師。維道顯謨。尊之崇之。有樂有禮。紛其羽籥。錯其簠簋。謂此器數。罔愜仰企。乃詔有司。乃鳩役使。乃伐堅石。乃削文梓。長廡重門。崇簷厚趾。剝落以完。漫漶以玼。革故爲新。衆目改視。是成化中兩修闕里孔廟。匏菴詩中述及羽籥簠簋。當在十二年增加籩豆後矣。

### 孝宗一首

孝宗諱祐楹。憲宗長子。建元弘治。在位十八年。崩葬泰陵。有詩集五卷。

翰林記。弘治初。上注意講學。遣太監戴義。傳示聖意。命學士李東陽等。各撰詩十首。用寓啓沃。東陽擬十題。各撰七言律詩一

章曰敬天曰法祖曰勤政曰務學曰任賢曰納諫曰節用曰愛民曰恤刑曰講武上嘉稱焉。  
靜志居詩話秦陵聖學維熙德修時敏非惟政事之勤實啓人文之化置永樂大典於便殿暇卽省覽又命儒臣集歷代御製詩以爲規範其賜予東陽靜中吟一首論者謂同二帝典諱三王訓詁焉。  
畫史會要孝宗萬幾之暇游筆自娛點刷精妍妙得形似。

### 闕里孔子廟詩

聖人之生天豈偶然命之大君俾贊化權二帝三王君焉克聖繼天立極道形於政大化既洽至治斯成巍巍蕩蕩渾乎難名周政不綱道隨時墜孔子聖人而不得位乃稽羣聖乃定六經萬世之師於焉足徵自漢而下數千餘歲褒典代加有隆勿替於皇吾祖居正體元六經是師卓爾化原列聖相承先後一揆逮及朕躬思弘前軌廟貌載崇祀事孔禋經言典訓彌謹彌敦俗化治成日升川至斯道之光允垂萬世

李東陽懷麓堂集弘治甲子春正月重建闕里孔子廟成上親製碑文祝辭遣臣東陽申祭告臣東陽奉命以閏四月丁卯陞辭癸未至於廟衍聖公臣聞韶率族人迓於郊遠近大小來會者數百計前三日時雨降及期雨霽成之後星月朗耀神人懼暢歌工舞佾奉器執事之臣下逮胥吏僕從皆忻忻然如雲之從風水之赴壑有不令而集者敢紀成事用告來世

### 世宗一首

世宗諱厚燠興獻王子憲宗之孫武宗無子入繼大統建元嘉靖在位四十五年崩葬永陵有詔學詩一卷宸翰錄一卷詠和錄一卷咏春同德錄白鵲贊和集一卷

名山藏世宗中興藩服。淹貫經史。傑作奇思。遠繼高帝。

殿陶詞林記。嘉靖八年正月元夕。臣道南應制。撰燈詞十五首以進。上親製一章云。黃道開蓬殿。青陽溢泰穹。賞春纔令節。養志自慈宮。珠佩軒車從。霞觴祝頌同。千秋還萬歲。物阜與民豐。九年七月。敬一亭成。上復命儒臣落成。錫宴進詩。十年演馬環碧殿。御製歌詞。賜同遊諸臣和之。十三年。臣自徽州賜裝。上親灑鐘梓宮詞。命和之。賜金綺有差。

弇山堂別集。肅廟以禮部尙書席書病目。賜詩問之。期以弼亮。以刑部尙書趙驥致仕。賜詩送之。嘉其止足。皆龍箋御墨。天書煥爛。真傳家之至寶。耀世之盛事也。

野獲編。世宗初政。每於萬幾之暇。喜爲詩。時命大學士費宏。楊一清。更定。或御製詩成。令二輔臣屬和以進。一時傳爲盛事。而張璠等用事。自愧不能詩。遂露章攻宏。謂其以小技希恩。上雖不詰責。而所出聖製漸希矣。上嘗命一清擬賦。上元詩進。呈有愛看冰輪清似鏡。上以爲似中秋。改云。愛看金蓮明似月。一清疏謝。以爲曲盡情景。不問而知爲元宵矣。聖資超悟。殊非臣下所及。信乎非一清所及也。惜爲瓊輩所撓。使天縱多能。不遑窮神知化耳。

### 欽天頌

予質也。味上荷簡在。答貺無由。心銘忤戴。庚寅仲冬。典禮肅雝。惟日長至。戒誓肅恭。大報皇天。庸秉微虔。獻以馨齊。薦以蒼瑄。禮嚴禋燎。樂備黃鍾。頓首誠惶。仰瞻帝容。帝錫洪仁。俯鑒微忱。露垂上瑞。福敷下民。神功惟祖。超今邁古。遺我小孫。受天之祐。玄德惟考。潛升穹昊。延予小子。荷天之保。寶露降祥。湛湛瀼瀼。綴若珠玉。津潤甘香。注之瑤琿。稽首而迓。薦于祖考。滋我禾稼。承以金觥。色溢精瓊。呈于慈闈。增算延生。浩浩蒼穹。錫我年豐。朕拜稽首。祇謁愚衷。蕩蕩昊慈。元樞不息。幹運四時。惟帝之力。日雨日暘。亶賴穹蒼。

嘉貺眇昧。家國平康。感恩曷已。敢爾恣侈。夙夜勉修。以拜帝祉。

神宗一首

神宗諱翊鈞。穆宗長子。建元萬曆。在位四十八年。崩葬定陵。有集一卷。

野獲編。今上以冲聖御宇。張江陵相公。進帝鑑圖。既以勸。講內列聖哲芳規。任愚覆轍二項。以寓勸戒。自是益勤史學。更命進講。貞觀政要。至十六年。閣臣進太祖御札。在內閣者。凡七十餘通。上命留內恭藏。因索累朝實錄。進覽。閣臣對以實錄成時。史臣俱會同焚稿於芭蕉園。人間並無底稿。惟皇祖世宗。特建皇史宬。以藏列聖實錄寶訓。但册牒稍廣。宜減爲書冊。庶便展閱。容令中書官臚進。陸續上呈。上允之。由是命匱石室之藏。俱登乙覽矣。

于慎行穀城山房集。上初卽位。好爲大書。內使環立。求書者。嘗數十紙。而外廷臣僚。得受賜者。惟內閣講臣而已。字畫遒勁。靈運風舞。時聖齡十餘歲矣。丙子。張公位及慎行。補入講幄。上顧相君曰。新講官二人。尙未賜與大字。內使已濡墨俟。上遂大書二幅。賜位及慎行。字畫比賜諸公者。稍大。莊勁勝前。時御齡已十五矣。

續玉筍詩談。司禮張維薊人也。少侍今上春宮。爲予言上初學詩。詠新月云。天邊一輪月。其形光皎潔。可比聖人心。乾坤多照徹。帝王氣象。宛然二十字中。

錢謙益列朝詩集。上天藻飛翔。留心翰墨。每攜太令鴨頭丸帖。虞世南臨樂論。米芾文賦。以自隨。勸學詩一章。御書賜太監孫隆。刻石吳中者也。內府藏顏魯公書孝經。命江陵相裝潢。頗識珠囊綈几。未嘗一日去左右。喪亂之後。朝士以百錢買得之。魯公法書精楷。儼如麻姑仙壇。每章有吳道子畫。精彩映發。手若未觸。天球琬琰。零落人間矣。

溧縣景命殿詩

翼翼京邑。溧水瀼瀼。璇源遠濬。載奠坤維。尊靈長樂。歡洽重闈。縣縣景命。百祿咸宜。瞻茲湯沐。啓瑞集禋。

周原膺。寶殿攸基。重門邃閣。崇敞透迤。仁祠左拱。靈宇右麗。薨連棟接。鳥革翬飛。虹祥式闡。慈念載怡。爰及薄海。耀景咸熙。聖母之德。綏此蒸黎。百千萬禩。永永無墮。

靜志居詩話。景命殿在溇縣水樂店。萬歷三十六年。勅建爲孝定皇太后祝釐。俗所稱九蓮菩薩者是。

莊烈帝一首

帝諱由檢。光宗第五子。天啓七年。以信王入踐大位。建元崇禎。在位十七年。寇陷京師。殉社稷。葬思陵。

沈壽世破夢閒談。上經營天下十有七年。恭儉似孝文。英果類世廟。白晷豐下。瞻視威嚴。聲若洪鐘。讀書日益寸。手書逼似歐陽率更。

杜濬變雅堂集。烈皇帝作松風二字。大不盈尺。端勁軒翥。非一時文士筆力所及。

吳偉業綵寇紀略。崇禎十二年。上佩楊嗣昌以督師輔臣印。嗣昌陸辭。先期光祿寺設饗於平臺。上親爲之起。酌醴命左右。宥以飲之者三。樂作。一小黃門奉黃封立於旁。發之。御製七言詩一章。鹽梅今暫作干城。上將威嚴細柳營。一掃寇氛從此靖。還期教養遂生民。嗣昌跪而誦之。拜且泣。

賜石砮土司秦良玉

蜀錦征袍手製成。桃花馬上請長纓。世間不少奇男子。誰肯沙場萬里行。

宋長白柳亭詩話。秦良玉石砮女官也。崇禎間帥師勤王。召見。御製詩四首。旌之。按良玉策楊嗣昌。邵捷春必敗。可謂洞晰機宜。甲申諸將得毋人人巾幗者乎。錦繡夫人。繡旗娘子。不能專美於前。

# 明詩紀事卷一下

## 甲籤

翰林記。吳元年七月乙亥。先是命選道童俊秀者。充樂舞生。至是始乘上御戟門。召學士朱升。領之入見。設雜樂。閱試。上親擊石磬。命升辨識五音。升以宮音爲徵音。上曰。何乃以宮作徵耶。因命樂生各歌一曲。上復歎曰。古者作樂以和民聲。格神人而與天地同和。近世儒者。鮮知音律之學。欲樂和順不難耶。其後命升等撰圜邱方邱樂章。而朝享太廟諸樂章。則詔翰林諸儒。臣梁寅等。分爲之。永樂元年九月。詔侍臣曰。皇考功德隆盛。祖宗樂章。未有稱述。爾等其議爲之。於是學士王景等。擬述以聞。然竟未施行。蓋缺典也。

靜志居詩話。魏樂府不成於曹。劉而成於繆。晉樂府不成於潘。左。張。陸。而成於傅。玄。宋樂府不成於鮑。謝。而成於何。承。天。北齊樂府不成於蕭。愨。而成於陸。瑒。皆屬恨事。明洪武樂章。率出四學士之筆。嘉靖樂章。率出議禮諸貴人之詞。假孝陵改命伯溫。季迪。永陵改命稗欽。君采。則其辭定遠。迥矣。斯。孝父之盛。不若是儒鈍矣。

田按。明初郊社廟樂章。孝陵御製之外。其可考者。圜邱方邱樂章。黃才伯。謂命學士朱升等撰進。余檢梁寅石門集。有擬告天地樂章。是時寅在禮局。承詔分撰郊社宗廟樂章。故有此作。則撰樂章。當不止寅一人。王子充有擬郊祀樂章。顧謹中有擬朝會樂章。當亦此時作也。實錄。洪武四年六月。吏部尙書詹周。禮部尙書陶凱。製宴享九奏樂章。成上之。其曲。一曰。本太初二。曰。仰大明。三曰。民初生。四曰。品物亨。五曰。御六龍。六曰。泰階平。七曰。君德成。八曰。聖道成。九曰。樂清甯。先是上厭前代樂章。率用諛詞。以爲容悅。甚者鄙陋不稱。乃命凱等更製。其詞既成。命協音律者歌之。謂侍臣曰。所製樂章。頗協音律。有和平廣大之

意自今一切流俗喧譁淫褻之樂。悉屏去之。六年。翰林承旨詹同。學士樂韶鳳等。上所製釋奠先師孔子樂章。又歷代帝王廟成。命錢宰擇樂章稱旨。此皆可一一指數者也。明初詞人率多鉅手。惜不得與於朝廷制作之列。汪朝宗鳳池吟稿。有大祀詩。末云。載歌周頌篇。庸擬祓樂章。頗致企羨之意。至嘉靖一朝制作。率出議禮貴人之手。竹垞之言信矣。今錄明一代樂章。播諸壇廟朝卜者。取其有合雅製。其當時擬製諸篇。亦附見於後云。

### 洪武元年祀社稷異壇同壇樂章

崇壇北向。明禋方闕。有潔犧牲。禮因物顯。大房載設。中情以展。景運既承。神貺斯衍。

### 右進俎凝和之曲

高爲山林。深爲川澤。崇邱廣衍。亦有原隰。惟神所司。百靈效職。清醴初陳。顛然昭格。

### 右大社初獻壽和之曲

實錄。洪武元年二月戊申。上親祭大社大稷。大社設正位在東。配以后土西向。大稷設正位在西。配以后稷東向。大社大稷位各用玉兩邸。幣以色。牲用犢一羊一豕一籩豆各十。簠簋各二。銅三。后土后稷位並同。但不用玉。先期皇帝散齋四日。致齋三日。先祭一日。設大次於社稷門外之西南向。設御位於壇內。當兩壇之北。居中南向。皇帝服皮弁服。備法駕詣大次。遂省牲。視鼎籩滌漑。有司陳設如儀。至日清晨。詣執事官。各實尊疊簠簋籩豆登銅。實玉帛於籩。置祝於神位之右。車駕至大次。太常卿奏中殿。皇帝服通天冠。絳紗袍。樂舞生及詣執事官。陪祭官入就位。太常卿奏外辦。皇帝入就位。贊禮唱迎神。協律郎舉麾。樂奏廣和之曲。贊禮唱請行禮。太常卿奏有司謹具。請行事。皇帝再拜。皇太子以下。在位官皆再拜。贊禮唱奠玉帛。皇帝詣盥洗位。擯圭盥。出圭詣大社神位前。協律郎舉麾。樂奏肅和之曲。皇帝跪。擯圭上香奠玉帛。出圭再拜。與次詣后土神位前。次詣



大稷壇。大稷后稷神位前。並如大社儀。復位。贊禮唱進俎。協律郎舉麾。樂奏凝和之曲。皇帝詣大社神位前。搢圭奠俎。出圭。次詣土神位前。次詣大稷壇。大稷后稷神位前。並如大社儀。復位。贊禮唱行初獻禮。皇帝詣盥洗位。搢圭滌。拭。以授執爵官。出圭詣酒尊所。搢圭執爵酌醴齊。以爵授執爵官。出圭詣大社神位前。協律郎舉麾。樂奏壽和之曲。武功之舞。皇帝跪。搢圭。上香祭酒奠爵。出圭。讀祝官取祝跪讀。皇帝俯伏。興。再拜。次詣后土神位前。次詣大稷壇。大稷后稷神位前。並如大社儀。復位。亞獻酌盞齊。樂奏豫和之曲。文德之舞。終獻酌汎齊。樂奏熙和之曲。文靈之舞。儀並同初獻。但不用祝。獻畢。太常奏飲福受胙。皇帝詣飲福位。再拜跪。搢圭。執事官以爵酌福酒跪進。皇帝受爵祭酒。飲福酒。以爵置於坫。奉胙官奉胙跪進。皇帝受胙。以授左右。出圭。俯伏興。再拜。興。皇太子以下。皆再拜。大稷壇如之。復位。贊禮唱徹豆。協律郎舉麾。樂奏雍和之曲。掌祭官各徹豆。贊禮唱送神。協律郎舉麾。樂奏安和之曲。皇帝再拜。皇太子以下。皆再拜。讀祝官取祝。奉幣官取幣。掌祭官取牲饌。詣瘞所。置於坎內。皇帝詣冢瘞位。執事置土於坎。實土至半。太常卿奏禮畢。駕還大次解嚴。

### 洪武元年祫享太廟樂章

維我皇祖。淑後貽謀。盛德靈長。與泗同流。發於孫枝。明禋載修。嘉潤如海。恩何以酬。

### 右熙祖廟初獻壽和之曲

承先人之德。化家爲國。母曰予小子。基命成績。欲報其德。昊天罔極。慇懃三獻。我心悅懌。

### 右終獻熙和之曲

樂奏具肅。神其燕嬉。告成於祖。亦右皇妣。敬徹不遲。以終祀禮。祥光煥揚。錫以嘉祉。

### 右徹豆雍和之曲

顯兮幽兮神運無迹鸞馭逍遙安其所適其靈在天其主在室子子孫孫孝思無斁

右送神安和之曲

實錄洪武元年四月丁未。祫享太廟。德祖皇考妣神位居中南面。懿祖皇考妣神位居東第一位。西向。熙祖皇考妣神位居西第一位。東向。仁祖皇考妣神位居東第二位。西向。先期皇帝散齋四日。致齋三日。前祭一日。皇帝服通天冠。絳紗袍。省牲視鼎。饌滌滌。有司陳設如儀。至日清晨。皇太子奉迎各廟神主。合祭於德祖廟。車駕至大次。太常卿奏中殿。皇帝服兗冕。太常卿奏外辦。皇帝入就位。贊禮唱迎神。協律郎舉麾。樂奏安和之曲。贊禮唱請行禮。太常卿奏有司謹具。請行事。皇帝再拜。贊禮唱奠帛。行初獻禮。皇帝詣盥洗位。搢圭盥帨。出圭詣爵洗位。搢圭滌爵拭爵。以爵受執事者。出圭詣酒尊所。搢圭出爵。交醴齊。以爵授執事者。出圭詣德祖神位前。協律郎舉麾。樂奏安和之曲。皇帝跪。搢圭上香奠帛。祭酒奠爵。出圭俯伏。與再拜。次詣懿祖神位前。次詣熙祖神位前。次詣仁祖神位前。皆如前儀。詣讀祝位。跪。讀祝官取祝跪讀訖。皇帝俯伏。與再拜。復位。贊禮唱行亞獻禮。各掌祭官以爵受酒尊於神位前。樂奏豫和之曲。文德之舞。皇帝再拜。終獻。樂奏熙和之曲。文德之舞。儀同亞獻。其終獻樂舞。則四代共之。贊禮唱飲福受胙。皇帝詣飲福位。再拜。跪。搢圭。執事官以爵酌福酒。跪進。皇帝受爵。祭酒飲福。以爵置於坫。奉胙。官奉胙跪進。皇帝受胙。以授左右。出圭俯伏。與再拜。復位。贊禮唱徹豆。協律郎舉麾。樂奏雍和之曲。掌祭官各徹豆。贊禮唱送神。協律郎舉麾。樂奏安和之曲。皇帝再拜。讀祝官取祝。奉幣官取幣。各詣燎所。贊禮唱望燎。皇帝詣望燎位。執事者以炬燎。火柴半燎。贊禮唱禮畢。皇太子奉神王。遠各廟。駕還大次解殿。

洪武六年釋奠先師孔子樂章

大哉宣聖道德尊崇。維持王化。斯民是宗。典祀有常。精純益隆。神其來格。於昭聖容。

右迎神咸和之曲

自生民來。誰底其盛。惟王神明。惟王後改度越前聖。黍帛具成。禮容斯稱。黍稷非馨。惟神之聽。

右奠帛甯和之曲

大哉聖王。實天生德。作樂以崇。時祀無斁。清酏惟馨。嘉牲孔碩。薦羞神明。庶幾昭格。

右初獻安和之曲

百王宗師。生民物軌。瞻之洋洋。神其甯止。酌彼金罍。惟清且旨。登獻惟三。於戲成禮。

右亞終獻景和之曲

犧象在前。豆籩在列。以享以薦。既芬既潔。禮成樂備。人和神悅。祭則受福。率遵無越。

右徹饌咸和之曲

有嚴學宮。四方來宗。恪恭祀事。威儀雍雍。歆格惟馨。神馭旋復。明禋斯畢。咸膺百福。

右送神復奏咸和之曲

實錄洪武六年八月。翰林承旨詹同。侍講學士樂韶鳳等。上所製釋奠先師孔子樂章。禮部尙書牛諒。復以所定禮儀進。其儀前祭一日。太常司官奏某月遣官祭先師孔子齋一日。次日清晨。皇帝服皮弁服。御奉天殿。傳制遣官。是日獻官承制畢。往祀所。省牲將祭。樂舞生就位。執事分獻陪祭官各就位。引贊引獻官就位。儀唱迎神。典樂舉麾。奏咸和之曲。獻官以下各四拜。典儀唱奠。行初獻禮。典樂舉麾。奏甯和之曲。獻官詣盥洗所。搯笏盥手出笏。典樂舉麾。奏安和之曲。文德之舞。獻官詣酒尊。

所執事者以爵受酒。獻官詣大成至聖文宣王神位前。跪搢笏奠帛。獻爵出笏。執事者取祝跪讀訖。獻官俯伏興。平身。次詣寗國、鄭國、沂國、鄆國、公神位前。皆如上儀。復位。典儀唱行亞獻禮。典樂舉麾。奏景和之曲。執事者以爵酌酒。奠於神位前。典儀唱行終獻禮。行分獻禮。其終獻禮。典樂舉麾。奏景和之曲。儀同亞獻。亞終舞皆同初獻。典儀唱飲福受胙。獻官詣飲福位。跪搢笏。執事者以爵進。獻官飲福酒。執事者以胙進。獻官受胙。出笏俯伏興。平身。復位再拜。分獻官及陪祀官皆再拜。典儀唱徹饌。典樂舉麾。奏成和之曲。執事者各詣神位前。徹饌。典儀唱送神。典樂舉麾。奏成和之曲。獻官以下皆四拜。典儀唱讀祝者捧祝。掌祭官捧帛饌。各詣廢所。獻官詣望瘞位。畢。制曰可。

### 洪武十五年重定宴饗九奏樂章

田按實錄。洪武十五年正月朔。上御奉天殿受朝賀。宴羣臣於謹身殿。初上命儒臣重制侑食九奏樂章。至是大宴。始奏用之。一奏炎精開運之曲。二奏皇風之曲。三奏眷皇明之曲。四奏天道傳之曲。五奏振皇綱之曲。六奏金陵之曲。七奏長楊之曲。八奏芳醴之曲。九奏駕六龍之曲。考明制大宴凡四。一。大祀慶成大宴。一。萬壽聖節大宴。一。冬至大宴。一。正旦大宴。皆用此樂章。朱氏詩綜。但題作慶成宴樂章。非其實也。永樂十八年。重定宴饗樂章。一。奏上萬壽之曲。二。奏仰天恩之曲。三。奏感地德之曲。四。奏民樂生之曲。五。奏感皇恩之曲。六。奏慶豐年之曲。七。奏集禎應之曲。八。奏永皇圖之曲。九。奏樂太平之曲。亦是四大宴通用。至嘉靖間。續定慶成宴樂章。則專用於慶成宴矣。

炎精開運。篤生聖皇。大明御極。遠紹虞唐。河清海宴。物阜民康。威加夷獠。德被戎羌。八珍有薦。九鼎馨香。鼓鐺鑼。鑼宮徵洋洋。怡神養壽。理陰順陽。保茲遐福。地久天長。

### 右一奏炎精開運之曲

皇風被八表。熙熙聲教宣。時和景象明。紫宸開繡筵。龍堯耀朝日。金鑪裊祥煙。濟濟公與侯。被服麗且鮮。列坐侍丹宸。磬折在周旋。羔豚升華俎。玉饌充方圓。初筵奏南風。繼歌廣載篇。瑤觴欣再舉。拜俯禮無愆。同樂及斯辰。於皇千萬年。

右二奏皇風之曲

赫赫上帝。眷我皇明。大命既集。本固支榮。厥本伊何。育德春宮。厥支伊何。藩邦以甯。慶延百世。澤被羣生。及時爲樂。天祿是膺。千秋萬歲。永觀厥成。

右三奏睿皇明之曲

馬負圖兮天道傳。龜載書兮人文宣。羲書卦兮禹疇敘。皇極建兮合自然。綿綿歷數歸明主。祥麟在郊威鳳舞。九夷入貢康衢謠。聖子神孫繼祖武。垂拱無爲邁前古。

右四奏天道傳之曲

周南詠麟趾。卷阿歌鳳凰。藹藹稱多士。爲楨振皇綱。赫赫我大明。德尊踰漢唐。百揆修庶績。公輔理陰陽。峨冠正襟佩。都俞在高堂。坐令八紘內。熙熙民樂康。氣和風雨時。田疇見豐穰。獻醴過三爵。歡娛良未央。

右五奏振皇綱之曲

長楊曳綠。黃鳥和鳴。茵菖呈鮮。紫燕輕盈。千花浥露。日麗風清。及時爲樂。芳尊在庭。管音嘒嘒。絲韻泠泠。

玉振金聲。各奏爾能。幡幡國老。載勸載懲。明德惟馨。垂之聖經。唐風示戒。永保嘉名。無已太康。哲人是聽。

右七奏長陽之曲

夏王厭芳醴。商湯遠色聲。聖人示深戒。千春垂令名。惟皇登九五。玉食保尊榮。日昃不遑餐。布德延羣生。天庖具豐膳。鼎鼐事調烹。豈但資肥甘。亦足養遐齡。達人悟茲理。恆令五氣平。隨時知有節。昭哉天道行。

右八奏芳醴之曲

明會典洪武二十六年定大宴儀。是日尙寶司設御座於奉天殿。錦衣衛設黃麾於殿外之東西。金吾等衛設護衛官二十四員於殿東西。教坊司設九奏樂歌於殿內。設大樂於殿外。立三舞雜隊於殿下。光祿司官設酒亭於御座下之西。膳亭於御座下之東。珍羞醴醢亭於酒膳亭之東西。設御筵於御座之東西。設羣臣四品以上位於殿內之東西。設羣臣酒尊食卓於殿外。設五品以下位卓於東西兩廊。司壺尙食各供乃事。引禮引羣臣。殿外東西相向立。儀禮司跪奏。請升座。駕輿。大樂作。升座。鳴鞭。樂止。鳴贊引文武官。四品以上由東西門入殿中。橫班北向立。五品以下官列於殿外丹墀北向立。樂作。贊四拜。樂止。光祿司官進御筵。大樂作。捧案至御前。樂止。進花樂作。進訖。樂止。光祿司官開爵注酒。捧詣御前。進第一爵酒。教坊司跪奏。一奏炎精開運之曲。贊內外官皆跪。教坊司跪奏進酒。飲畢。贊衆內外官俯伏興。樂作。贊四拜。樂止。贊各就位。序班隨進羣臣卓。散花樂作。散訖。樂止。序班即進羣臣盞。第二爵酒。教坊司跪奏。二奏皇風之曲。樂作。光祿司官斟酒御前。序班隨斟羣臣酒。教坊司跪奏進酒。候皇帝舉酒。羣臣以次舉。飲訖。樂止。光祿司官進湯。鼓吹響節前導。至殿外。鼓吹止。殿上樂作。羣臣起立。光祿司官進湯御前。羣臣復位。序班即供羣臣湯。樂止。教坊司跪奏進湯。樂作。候皇帝舉箸。羣臣次舉。皇帝進湯訖。贊饌成。樂止。武舞入。教坊司跪奏平定天下之舞。舞士三十二人。皆左執干。干長三尺五寸。上闊一尺。下廣六寸。朱質。上畫雉羽。中畫升龍雲。

氣右垂。戚長二尺五寸。硃紅漆柄金妝。戚斧分爲四行。每行八人。舞作發揚蹈厲。坐作擊刺之狀。皆冠黃金束髮冠。紫紛纓。青羅生色畫舞鶴花窄袖衫。白生絹襯衫。錦領紅羅銷金大袖窄袍。紅羅銷金裙。卓生色畫衣。沿襟白羅銷金汗袴。藍青羅銷金沿紅絹。項紅結子。紅絹束腰。塗金束帶。青絲大繸錦臂鞵。綠雲頭卓靴。舞師二人。執旌以引之。旌長七尺五寸。硃紅漆柄。金龍吞口。懸五巴羽九層。每層用塗金寶蓋。紅絲織穿末垂絲結子。皆冠黃金束髮冠。紫紛纓青羅大袖衫。白絹襯衫。錦領塗金束帶。綠雲頭卓靴。舞畢出。第三爵酒。教坊司跪奏。三奏春皇明之曲。樂作進酒如前儀。樂止。教坊司跪奏。舞安四夷之舞。舞士十六人。東夷四人。推髻。加後繫紅銷金頭繩。紅羅銷金抹額。中纓塗金博山。兩旁纓塗金環。明金耳環。青羅生色畫衣。大袖衫。紅生色領袖。紅羅銷金裙。青銷金裙。綠紅生絹襯衫。錦領塗金束帶。烏皮鞋。西戎四人。閒道錦纏頭。明金耳環。紅紵絲細褶襖子。大紅羅生色雲肩。綠生色沿藍青羅銷金汗袴。紅銷金沿繫腰。合鉢十字泥金數珠。五色銷金羅香囊。紅絹攤項紅結子。赤皮靴。南蠻四人。縮朝天髻。繫紅羅生色銀錠紅銷金抹額。明金耳環。紅織金短襖子。綠織金細褶短裙。絨綿袴子。閒道紵絲手巾。泥金項牌。金珠纓絡。纓小金鈴。錦行纏。泥金獅鬘帶。綠銷金攤項紅結子。赤皮靴。北狄四人。戴單于冠。貂鼠皮簷雙垂髻。紅銷金頭繩。紅羅銷金抹額。諸色細褶襖子。藍青生色雲肩。紅結子。紅銷金汗袴。繫腰。合鉢卓皮靴。四夷各爲一行。舞作拜跪。朝謁喜躍俯伏之狀。舞師二人。執幢以引之。幢長七尺五寸。硃紅漆柄。金龍吞口。懸五綵羅幢五層。每層纓五色銷金吹帶。末垂紅粉結子。皆戴白捺簷氈帽。塗金帽頂。一撒紅纓紫羅帽。漆紅綠金繡襖子。白銷金汗袴。藍青銷金沿塗金束帶。綠攤項紅結子。赤皮靴。舞畢出。第四爵酒。教坊司跪奏。四奏天道傳之曲。樂作進湯如前儀。食畢。教坊司跪奏。車書會同之舞。舞士三十二人。左執籥。籥長一尺五寸。硃紅漆筍竹爲之。上開三竅。右秉翟。翟長三尺五寸。硃紅漆柄。金龍吞口。上纓雉羽五層。每層用塗金寶蓋。紅絲織穿。末用紅綠結子。分爲四行。每行八人。舞坐作進退舒徐揖讓升降之狀。皆冠黑光描金方山冠。青紛纓。衣素紅羅大袖衫。紅生絹襯衫。錦領紅羅攤項紅結子。塗金束帶。白絹大口袴。白布覆茶褐鞋。舞師二人。執翮以引之。翮長七尺五寸。硃紅漆柄。金龍吞口。懸白鸞羽九層。用塗金寶蓋。紅絲織穿。末垂紅絲結子。冠服與舞士同。惟大袖衫用青。不用紅羅項

紅結子。舞畢出。第五爵酒。教坊司跪奏。五奏振皇綱之曲。進酒如前儀。飲畢。教坊司跪奏百戲承應。舞畢出。第六爵酒。教坊司跪奏六奏金陵之曲。進酒進湯如前儀。教坊司跪奏。八變獻寶進呈。舞畢出。第七爵酒。教坊司跪奏七奏長楊之曲。進酒如前儀。教坊司跪奏。採蓮隊子承應畢出。第八爵酒。教坊司跪奏。八奏芳醴之曲。進酒進湯如前儀。食畢。教坊司跪奏。魚躍于淵。承應畢出。第九爵酒。教坊司跪奏。九奏駕六龍之曲。進酒如前儀。飲訖。光祿司官收御前時。序班隨收羣臣盞。光祿司官進湯。進大膳。大樂作。羣臣起立。進訖復坐。序班隨供羣臣飯。教坊司跪奏。進膳食訖。贊膳成樂止。光祿司官收膳訖。教坊司跪奏。百花隊舞承應。舞畢出。鳴贊唱撤案。序班撤羣臣卓訖。光祿司官即撤御案。贊宴成。羣臣皆出席向北立。序班即撤羣臣座。殿外官皆詣丹墀北向立。贊鞠躬。樂作。贊四拜。興。平身。樂止。羣臣分東西立。儀禮司跪奏。禮畢。駕輿。大樂作。鳴鞭。百官以次出。

嘉靖九年祀先蠶樂章

載舉清觴。蠶祀孔明。以格以享。鼓瑟吹笙。陰教用彰。坤儀永貞。神之聽之。鑒此禋誠。

右亞獻順和之曲

神之格思。桑土是宜。三縑七就。惟此繭絲。獻禮有終。神不我遺。錫我純服。藻繪皇儀。

右終獻甯和之曲

范守已爾皇外史。初夏言清理皇莊事竣。疏言宜將貢郭官莊。改爲規蠶廠。種植桑柘。以備蠶事。戶部覆議不合而止。嘉靖九年二月。郊祀。官奉命分獻南海。因而有感。遂疏請舉親蠶禮。帝嘉納之。勅戶部。建壇尙書梁材上言。宜建於皇城南內。或西內。堪備蠶事。帝曰。周禮耕蠶分於南北郊。其蠶於禁中。唐人便安之制。不可爲法。於是禮部尙書李時等。請行於北郊。酌治蠶之



禮。定壇壝之向。制采桑之器。擇掌壇之官。覆車出入。或從東華門。或從元武門。用謹厚內臣。用肅宮禁。帝從之。命覆車出入。由元武門。其壇制。殺先農。什一。建具服殿。蠶室。繭館。俱如古制。仍於西內營織堂。以終蠶事。

明會典嘉靖九年。初建先蠶壇於北郊。歲春擇日。皇后躬祀先蠶。行親蠶禮。十年。改築壇於內苑。致祭。行親蠶禮。齋戒前期三日。尚儀奏致齋三日。內執事並司贊六尚等女官。及應入壇者。各齋二日。正祭先一日。蠶宮令陳樂女生。位於壇南。設皇后拜位於壇下。北向。次公主。次內命婦。次外命婦。拜位俱異位。重行北向。設內贊位於壇南。設司贊位於皇后拜位之東西。設司賓位於外命婦班之北。東西相向。皇后至壇所。入具服殿。少憩。司賓先引外命婦。列於先蠶壇下。東西相向。以北爲上。尚儀詣皇后前。奏請皇后易禮服。出殿門。將至壇。內贊唱樂女生就位。執事官各司其事。導引女官。導皇后至拜位。司贊奏就位。次公主。次內命婦。又次外命婦。各就拜位。內贊唱縻毛血。迎神。奏貞和之曲。樂作。樂止。司贊奏四拜。公主以下同。內贊唱奠帛。行初獻禮。奏壽和之曲。樂作。執事官捧帛爵。跪於神位前。各奠訖。樂暫止。內贊唱讀祝。司贊奏跪。皇后跪。公主以下同。讀祝女官跪於神位前。右讀訖。樂作。司贊奏興。皇后興。公主以下同。樂止。內贊唱行亞獻禮。奏順和之曲。樂作。執事官捧爵。跪奠於神位前。樂止。內贊唱行終獻禮。儀同亞獻。奏審和之曲。執事女官。進立壇東西向。唱賜福胙。司贊奏跪。皇后跪。執事女官。以福酒跪進於皇后右。奏飲福酒。皇后飲訖。執事女官。以胙跪進於皇后右。奏受胙。皇后受胙訖。司贊奏興。皇后興。司贊奏二拜。公主以下同。內贊唱撤饌。奏安和之曲。樂作。執事女官。詣神位前。撤饌訖。樂止。內贊唱送神。奏恆和之曲。樂作。司贊奏四拜。公主以下同。樂止。內贊唱讀祝官捧祝。執事官捧帛饌。各詣壞位。樂作。樂止。司贊唱禮畢。皇后還具服殿。更常衣。行親蠶禮。

### 嘉靖十年大禘樂章

於惟皇祖。肇創丕基。鍾祥有自。曰本先之。奄有萬方。作之君師。追報宜隆。以申孝思。瞻望稽首。介我休禱。

右迎神元和之曲

木有本兮水有源。人本祖兮物本天。思報德兮禮莫先。仰希鑒兮敢弗虔。

右初獻壽和之曲

田按嘉靖十年帝以禘義詢大學士張璁令與侍講學士夏言議言撰禘義一篇獻之大意謂自秦漢以來封建之制廢無世家譜牒不明莫知其祖所自出若必欲如虞夏商周之禘黃帝帝嚳則既無所考若必欲強求其人以事穿鑿如唐之以昭爲祖則又非孝子慈孫之所忍爲謹推明古典采酌先儒精微之論宜爲虛位以祀帝深然之會中允廖道南謂朱氏爲顓頊裔請以太祖實錄爲據禘顓頊遂召禮部以言道南二疏會官詳議大學士璁首言虛位者求之虛則失之誠惟禘德祖爲當羣臣以璁言爲是帝意主虛位令再議言復疏論禘德祖有四可疑德祖自開國以來享始祖之祭舊矣今又以爲所自出之帝是不過強易置其名耳且禘以德祖祫以太祖則懿熙仁三祖既不得相從於禘又不得降從太祖於祫是廢三祖之祭也帝併下其草諸臣乃請設虛位以禘皇初祖南向奉太祖配西向禮部上大禘儀注前期告廟致齋三日佈香帛牲醴如時享儀至日行禮如大祀圜邸儀樂章迎神元和之曲初獻壽和之曲亞獻仁和之曲終獻德和之曲徹饌太和之曲送神永和之曲

嘉靖十一年雩祀雲門曲

景龍精兮時見。測鶉緯兮宵懸。肆廣樂兮鏗匏。列皇舞兮踴躡。祈方社兮不莫。薦圭璧兮孔虔。需密雲兮六漠。霈甘澍兮九元。慰我農兮旣渥。錫明昭兮有年。

靜志居詩話嘉靖十一年禮臣等議以郊以禮爲重雩以樂爲主合照圜邸樂舞之數以四方之色成樂舞之服庶稱古人盛樂皇舞之制兼請三獻禮成之後九奏樂止之時命詞臣撰括雲漢詩詞別製雲門一曲使文武之士青衣執羽並舞而合歌

之。乃定議迎神奏中和之曲。奠帛奏肅和之曲。進俎奏咸和之曲。初獻奏壽和之曲。亞獻奏景和之曲。終獻奏永和之曲。徹饌奏凝和之曲。送神奏清和之曲。望燎奏太和之曲。祭畢使道童歌雲門之曲。

嘉靖十五年九廟特享樂章

禮畢樂成。神悅人宜。籩豆靜嘉。敬徹不遲。穆穆有容。秩秩其儀。益祇以嚴。矧敢斃於斯。

右太祖廟徹饌豫和之曲

於維文皇。重光是宣。克戡內難。轉坤旋乾。外讐百蠻。威行八埏。貽典則於子孫。不忘不愆。聖德神功。格於皇天。作廟奕奕。百世不遷。祀事孔明。億萬斯年。

右成祖廟迎神太和之曲

明明我祖。盛德天成。至治訏謨。遙駿有聲。專奠致享。惟古經是程。春祀有嚴。以迓聖靈。惟陟降在庭。以資我思成。

右仁廟迎神太和之曲

宣廟英廟  
憲廟同

樂比聲歌。佾舞婆娑。稱彼玉爵。酒旨且多。獻享惟忠。神聽以和。孝孫在位。受福不那。

右仁廟終獻甯和之曲

宣廟英廟  
憲廟同

列祖垂統。景運重熙。於惟孝皇。敬德允持。用光於大烈。化彼烝黎。專廟以享。經禮攸宜。俎豆式陳。庶幾來

思。

右孝廟迎神太和之曲武廟迎神亦同此曲惟易於惟武皇昭德敕威斥翦除奸凶大業弗隳四句

田按明初作四親廟於宮城東南各爲一廟。德祖居中。太祖東第一。熙祖西第一。仁祖東第二。皆南向。洪武八年。改建太廟。爲同堂異室之制。中室奉德祖。東一室奉太祖。西一室奉熙祖。東二室奉仁祖。皆南向。建文卽位。奉太祖主。正殿神座次熙祖。東向。寢殿神主。居西二室。南向。成祖遷都。建廟如南京制。宣德元年。奉成祖。正殿神座次仁祖。西向。寢殿神主。居東第三室。南向。二年。仁宗。正殿神座次太祖。南向。寢殿神主。居西第三室。南向。其後大行。皆以次居東四室。孝宗卽位。憲宗。升時九廟。已備。禮臣謂德祖視周后稷。不可祧。憲宗升。當祧。宜於太廟。寢殿後。別建祧殿。如古夾室之制。歲暮。則奉祧主合享。如古禘祭之禮。帝從其議。其後奉祧皆倣此。嘉靖初。既尊皇考爲睿宗。獻皇帝。特立世廟。繼又以皇考。專享世廟。而成祖以下。不得專廟以祀。於心未安。十五年。新廟成。特建成祖以下七廟。改世廟爲睿廟。合太廟而九。定九廟特享儀。此樂章所謂專廟以享。紀其事也。至二十四年。又罷特廟之祀。

### 王國祀仁祖廟樂章

皇圖聿崇。茅社受封。禮分雖異。孝思則同。緬懷世德。源深流鴻。報本有祀。式昭神功。

### 右迎神淳和之曲

王國之東。清廟翼翼。奉我皇祖。享祀弗忒。薦以牲粢。敢曰充膺。神其迪嘗。純嘏是錫。

### 右奉牲慶和之曲

皇祖載德。既淳且仁。弗耀其身。委社後人。睠茲藩服。典祀維寅。清醴方薦。歆其苾芬。

右初獻保和之曲

穆穆靈宮。庭燎有煒。貳觴載升。神其樂止。其樂伊何。錫我繁祉。磐石之宗。本支百世。

右亞獻清和之曲

神兮下臨。陟降在庭。不見其形。如聞其聲。冷風肅然。達於兩楹。禮成之終。神保攸甯。

右終獻成和之曲

神具醉止。威儀孔肅。曰爾孝孫。來飲爾福。介爾眉壽。膺爾百祿。子孫保之。以引以續。

右飲福咸和之曲

禮備樂舉。祀事攸宜。孰其尸之。廢徹不遲。皇哉神惠。覃及我私。靈氛將逝。如何無思。

右徹豆嘉和之曲

杳兮忽兮。神運無迹。鸞馭上征。星流颯疾。其靈在天。其主在室。億萬斯年。孝思無斁。

右送神德和之曲

明集禮親王祭仁祖廟儀。前期王散齋四日。致齋三日。前祭一日。典祠啓王服。遠遊冠。絳紗袍。典儀典祠導引王省牲視鼎饈。祭日清晨。典祠啓王服冕服。典儀典祠導引王入就位。司禮唱迎神樂。工奏清和之曲。司禮唱行禮。典祠啓行事。鞠躬拜。興。平。

身。司禮唱奠幣。行初獻禮。樂工奏保和之曲。復位。司禮唱行亞獻禮。樂工奏清和之曲。復位。司禮唱行終獻禮。樂工奏成和之曲。復位。司禮唱飲福受胙。復位。司禮唱徹豆。樂工奏和之曲。司禮唱送神。樂工奏德和之曲。司禮唱望燎。樂工奏□□之曲。典祠啓禮畢。導王還次。

田按此王國祀仁祖廟樂章。見宋濂文集。與明集禮所載儀制。少有不同。或濂擬未用。或用而後有增損。今不可知矣。

擬祭告天地樂章

仰明明。瞻巍巍。如事父。栗以夔。物莫稱德。曷報之。酌用陶匏。斯其宜。

右上帝酌獻

# 明詩紀事卷二上

## 甲籤

田按明史藝文志集部稱各藩及宗室自著詩文集已見本傳不載及檢本傳良不盡然蓋史館編纂時以王鴻緒史藁爲底本史藁藩王宗室自著詩文集散見於本傳中故志文云然明史於本傳削去詩文集名僅存一二體例簡嚴史法應爾但於藝文志內未及將所削詩文集名補入而史藁所稱本傳已見不載原文亦未刪去今將明史所載宗藩集名及史所未載而見於史藁並四庫總目各家書目總集專集雜載所述備列於此以待參考秦藩簡王誠沐賓竹小鳴藁十卷王孫敬鍾自吟亭詩草敬鑑梅雪軒詩藁四卷諠斗有集晉藩慶成榮門王慎鍾太霞藁寶善堂藁二卷周藩憲王有燧誠齋錄新錄鎮平恭定王有燠德善齋詩集鎮國中尉睦樵陂上集二十卷輔國中尉睦橫奉國將軍勤化干孫朝壘三世詩合爲三業集楚藩莊王孟炫勤有堂詩集憲王季垹賦秀軒集武岡保康王顯槐少鶴山人集十六卷王孫華園梅湖桃溪集齊藩王孫慶漿籜冠集魯藩靖王肇輝懋虛藁惠王泰堪悔齋藁莊王陽鑄尊德堂藁鎮國中尉頤瑑赤霞館集安邱奉國將軍頤墉玄同館集王孫頤媿市隱堂集六卷蜀藩獻王椿獻園集定王友垓有集十卷惠王申鑒惠園集成王讓栩長春競辰集十六卷端王宣圻端園集代藩瓊邱榮順王遜炏雲溪藁王孫俊格天津集髮垣王孫俊際佩蘭集肅藩靖王眞泐星海集遼藩簡王植有集庶人憲榔味祕草堂集輔國中尉術均綦組堂集鎮國將軍薰雙哀黍離詩薰樞鄧中御史集光海榮端王寵瀆博文堂藁王孫儼鏞句曲山人詩甯藩獻王權采芝吟靖王奠培仙謠卻壻吟擬古詩建安奉國將軍拱植瑞鶴堂集石城王孫拱樾巢雲集四卷鎮國中尉謀璋枳園近藁王孫謀晉羔雁淹留蕪城市車四集端昌鎮國中尉多煊國香集奉國將軍多燾用晦集樂安

中尉多熔支離市隱集鎮國中尉統鐵適園詩集面壁齋文集弋陽輔國將軍拱檜負初集二卷奉國將軍多燧委蛇集奉國將軍多炆五遊劄遊集甯國王孫謀堯享筵集謀境擊轅集容重初吟草瀋藩安王詮鈺凝齋集王胤修清秋唱和集保和齋葦宣王恬皎綠筠軒葦定王瑤堯修樂堂崇玉山房葦沁水唐僊王與增衡漳葦滄海披沙集鎮國將軍恬燦振菴集鎮國將軍恬焯洋菴集輔國將軍瑄圻怡真亭葦輔國將軍瑄瑄玉田集奉國將軍效凝玄攬齋盤秀山房集清源莊簡王幼圻飲河集二十五卷續集八卷王孫胤杻重瞳老人集德平榮順王胤胤集書樓葦安慶端懿王恬燿嘉慶集鎮康恭裕王恬焯西嚴漫葦奉國將軍效錫壺峯集唐藩成王彌錡瓊天小葦恭王彌鉗謙光堂詩集秋江詞三城康穆王芝境進修葦承休昭毅王彌錡存齋樂府復齋錄新野鎮國中尉碩勳巨勝園集輔國中尉器封菓園集漢庶人高照擬古感興詩趙藩康王厚煜居敬堂集十二卷荆藩富順王厚琨東蕝集二卷樊山王栩鉅廣譚堂集二十四卷王孫載塔大隱山人集衡藩新樂康憲王載璽樓居田居葦夢甌神覽集益藩莊王厚燁勿齋集詠史詩王孫常淵防露館葦纒集則中尉觀樞輯海岳豐秀集新樂王載璽輯諸藩著述爲綺合齋揚集中尉謀璋輯藩藻麟角集明藻詩菁英

周定王櫛四首

王太祖第五子洪武三年封吳十一年改封周洪熙元年薨有元宮詞一卷

名山藏王好學能詞賦工書從上所賜元姬得聞元宮中事製元宮詞百章時人以比之三輔黃圖

田按定王賦元宮詞百篇水樂時獻頌九章頗著文采嘗登天桂清香之樓俯瀾雲之亭召從臣曾子禎那爾愚周是修同遊子禎獻賦云惟吾君之英姿兮疊琮琤而含章稟天然之上智兮允博學以無方爾愚賦云效姬且之屬屬兮若不勝乎捧持獻賦而上安兮亦友于而下施是修賦云傲東平之爲善兮慕河間之執清培玉濱於萬世兮臻百福而長榮王答賦云暨三臣之進言兮俱有倫而有理飭先後與始終兮將啓沃乎吾志彼聲也與改遊兮固非吾之所尙暨神仙之杳冥兮多徒勞



於夢想文宴從容不減梁園故事。王有十五子。憲王有燉。博學善書。鎮平王有煥。工詩歌書畫。周是修。蜀薨集。稱郡王殿下。和明本中峯梅花百咏詩。雅雅端潔。惜今不傳。

### 元宮詞

蜜漬金桃始獻新。禁城三伏絕罽塵。炎蒸微至清甯殿。玉杵敲冰賜近臣。  
侍從皮帽總姑麻。罽罽高冠勝六珈。進得女真千戶妹。十三嬌小喚茶茶。  
奎章閣下文詞盛。太液池邊遊幸多。南國女官能翰墨。外間鈔得竹枝歌。  
隊裏惟誇三聖奴。清歌妙舞世間無。御前供奉蒙深寵。賜得西洋塔納珠。

### 蜀獻王椿一首

王太祖第十一子。洪武十一年封。二十三年就藩成都。永樂二十一年薨。有獻園集。

田按獻王儒雅好學。孝陵呼爲蜀秀才。嘗奉命講武中。都關西堂。延名士李叔荆。蘇伯衡等。商榷文史。叔荆名績。以字行。臨川人。洪武戊辰。與伯衡同主會試。伯衡爲叔荆作先考北廬墓誌。甚致推挹。余甄其詩錄別卷。王之國後。聘漢中教授。方孝孺爲世子傅。傾懷下接。嘗與孝孺書云。公西州之冠也。有識者無不心悅誠服。而新學晚生。亦有所依歸也。余一日不見。有如三秋。又云。懿文清節。有東漢之風。尙志立言。爲當代之重。詞旨雅令如此。惜獻園集不傳。

### 賜方教授詩

伊昔開東閣。相看眼獨青。文章奏金石。衿佩覩儀型。應世遊三輔。焉能困一經。前星垂炳耀。染翰侍彤庭。

甯獻王權二首

王太祖第十七子。洪武二十四年封。二十七年就藩大甯。永樂二年移南昌。正統十三年薨。有采

芝吟四卷。

名山癡王。白哲美髯。負氣好奇。嗜學博古。自其髫髻時。自稱大明奇士。老號癡仙。所論著及於卜筮。修煉琴弈諸書。手製博山爐。及古瓦硯。皆極精緻。

列朝詩集。王恃靖難功。頗驕恣。多怨望不遜。作日蝕詩云。光浴咸池正皎然。忽如投暮落虞淵。青天俄有星千點。白晝爭看月一弦。蜀鳥亂嘯疑入夜。杞人狂走怨無天。舉頭不見長安日。世事分明在眼前。以此詩徵之。王之怨。至信矣。又作甕雲詩云。蔡入琴書潤。粘來几榻寒。小齋非嶺上。弘景坐相看。王每月令人往廬山之巔。甕雲以歸。結小屋曰雲齋。障以簾幙。每日放雲一囊。四壁氤氳。如在崑洞。余觀周憲王有送雪詩。臘仙甕雲。靈王送雪。此宗藩中佳話。可屬對也。

宮詞

新選昭儀進御來。女官爭簇上平臺。宮中未識他名姓。都把花名作字猜。  
忽聞天外玉簫聲。花下聽來獨自行。三十六宮秋一色。不知何處月偏明。

雙槐歲抄。臘仙宮詞。忽聞天外玉簫聲一絕。王司綵宮詞。瓊花移入大明宮。旖旎濃香入晚風。贏得君王留步聲。玉簫嘹唳月明中。是時賢妃權氏。順妃任氏。昭儀李氏。婕妤呂氏。美人崔氏。皆朝鮮人。權尤穠粹。善吹玉簫。永樂八年。侍上征虜。遠至臨城。薨。謚恭獻。朝鮮國王李芳遠。驛送妃父權永均。至拜光祿寺卿。食祿不管事。尋遣歸國。買女不復至。聖德剛明。不爲蠱惑如此。

漢庶人高煦一首

庶人成祖第二子。永樂二年封漢王。十五年就藩宣德。八年叛。降庶人。執道遙城死。國除。有擬古感興詩。

擬古

武皇藉文景。民殷倉粟陳。不守清淨化。開邊政多門。四方屢遊幸。萬里馳三軍。有子不自保。哀哉真少恩。外虛仁義名。奈茲多欲身。神仙在何處。茂陵今幾春。

周憲王有燉三首

王周定王長子。太祖孫。洪熙元年襲封。景泰三年薨。有誠齋錄新錄諸集。

朱謀埠藩獻記。憲王好文辭。兼工書畫。

書史曾要。憲王集。六名迹十卷。手自摹臨。勒石傳世。名曰東書堂法帖。

沈德符顧曲雜言。周憲王所作雜劇。最夥。名誠齋樂府。雖警拔稍遜古人。而調入絃索。穩叶流麗。猶有金元風韻。

列朝詩集。憲王遭世隆平。奉藩多暇。製誠齋樂府傳奇。音律諧美。流傳內府。至今中原絃索多用之。李夢陽汴中元宵絕句云。

中山孺子倚新妝。趙女燕姬總擅場。齊唱憲王新樂府。金梁橋外月如霜。王詩如春日云。深巷日斜巢燕急。小樓風靜落花閒。

春夜云。彩檻露濃垂柳溼。珠簾風靜落花香。秋夜云。梧桐露滴鴛鴦瓦。楊柳風寒翡翠堂。牡丹亭書景云。鶯囀小院穿青柳。燕

蹴飛花過粉牆。日暮云。林鳩喚友常知雨。海燕將雛不避人。雲林清趣云。采藥一僧雲外去。巢松雙鶴雨中還。送人云。南浦斷

虹收雨去。西風新雁帶霜來。漫興云。南國音書歸雁盡。西園風雨落花愁。和王長史云。採得藥苗還竹徑。著殘棋子坐花陰。紅

心驛云。枕上夢迴鶯語滑。窗前風定柳陰涼。橫隄晚望云。神如秋水十分淨。心似中原萬里平。皆風華和婉。瀟瀟乎盛世之音。

也。

### 雲英

雲英何處訪遺蹤。空對陽臺十二峯。花院無情金瑣合。蘭房有路碧苔封。消愁茶煑雙團鳳。綵恨香盤九  
篆龍。腸斷清樓閣裏。墨痕燭炷尙重重。

列朝詩集。雲英姓夏氏。靈王之宮人也。生五歲。開誦孝經。七歲。盡通釋典。淡妝素服。色藝絕倫。其居曰端清閣。有端清閣詩一卷。年二十二。臥病。求爲尼。以了生死。受菩薩戒。作偈示衆而卒。靈王自爲誌銘。

### 柳枝歌

蘇小門前萬縷垂。自家園內兩三枝。聽歌看舞人何在。惟有東風展翠眉。

### 送雪

天山一色凍雲垂。罨畫樓臺綴玉時。准備煖金香盒子。明朝送雪與相知。

列朝詩集。汴中風俗。每歲遇初雪。則以合子盛雪。送與親知。以爲喜慶。置酒設席。相請歡飲。亦昇平之樂事。宮中尤尙之。

### 秦康王志塚一首

王隱王尚炳第三子。愍王棧之孫。太祖曾孫。宣德三年。以富平王進封。景泰六年薨。有默菴集。

### 送凌漢章還茗

束書孤劍別西秦。紅樹青山潑眼新。千里風塵雙短鬢。五湖煙水一閒身。夢回孤館寒砧急。望入遙空候

雁賓料得紀行多賦詠。雲箋無惜寄陽春。

楚憲王季垵二首

王莊王子太祖曾孫。初封武陵王。正統五年襲封。八年薨。有毓秀軒集。

楚紀王務學時敏。嘗夢持水晶筆大書。自茲文藻煥發。詩調高曠。題東平圖云。東平昔賢王。居家惟樂善。富貴非所樂。忠誠意無倦。讜言契宸衷。奏疏答天眷。永言躡芳蹤。千載繼成憲。河間圖云。我聞河間賢。懋學由好古。心契義皇奧。神遊洙泗浦。求書留其真。道術言有補。九原不可作。百世吾嚆與。至今士林多誦之。所著有毓秀軒詩。維藩清暇錄。管延枝爲之序。

昭王碑詩

高皇奉天。大正四海。肅肅昭王。維皇之子。茫茫江漢。爰初賜履。秉德執誠。以綏以理。溫溫靖恭。翼翼小心。惟孝顯顯。惟忠湛湛。臨下惟和。莅衆惟欽。允文允武。如玉如金。奕奕楚邦。寔奠南紀。時敍物豐。風厚俗美。瑤琨在園。帝嘉其賢。民受厥祉。茲祀有虔。嗚呼祖考。陟降在天。錫監垂祚。裕我後昆。

莊王碑詩

懿我楚國。王祖肇封。爰及王考。帝訓是崇。仰惟帝訓。子孫矩度。保國安民。式由皇路。啓之承之。念茲在茲。宜我家國。世濟光熙。江漢朝宗。藩翰攸峙。天監厥衷。用錫我類。閔予小子。嗣守家邦。允懷繼述。夙夜匪遑。峨峨昭園。莊園在側。穹碑有辭。用示無極。

潘安王詮錄一首

王莊王幼塲次子。簡王模曾孫。太祖玄孫。初封靈川王。正德四年薨。諡榮毅。後以孫憲王胤移進封。更諡安。有疑齋稿。

送五臺山僧明曉

曉來法席尙餘香。雲水悠悠道路長。錫杖撥開三晉雪。衲衣披盡五臺霜。經傳般若談偏熟。禪入維摩語並忘。若到深心三昧地。應知無處覓行藏。

秦簡王誠泳四首

王惠王公錫子。康王孫。太祖來孫。自號賓竹道人。弘治元年。以鎮安王襲封。十一年薨。有經進小鳴稿十卷。

四庫總目。誠泳詩。古體清淺而質樸。近體諧婉可誦。七絕尤爲擅場。如秋夜詩云。霽月滿窗明似畫。梧桐如雨下空庭。又云。空庭久坐不成寐。明月滿階粘杵聲。又山行詩云。嘯鳥無聲僧入定。半巒風落紫藤花。皆風骨戾削。往往有晚唐格意。爾時館閣之中。轉無此清音矣。

列朝詩集。王年十歲。康王妃陳。教以小學。日記唐詩一章。惠王聞吳人湯潛名能詩。請爲教。傳聲律之學。嗣位日賦一詩。積三十年。王醜雅有簡押。博通羣書。布衣蔬食。延攬文儒。竟日談論不倦。護儀子弟。得入寶宮。自王始也。詩曰。賓竹小鳴集。嘉靖元年。王孫定王惟焯表上之。詔送史館。

田按秦簡王詩。色麗音婉。不愧日課一詩之目。

### 隴頭吟

萬里奔馳隴頭水。日夜鳴鳴亂人耳。黃沙白草兩茫茫。怕聽水聲愁欲死。一從結髮戍涼州。鐵甲磨穿已  
禿頭。兒孫養得解胡語。不如隴水解東流。

### 春詞

海棠枝上鵲聲乾。羅幕重重護曉寒。初日半林珠露重。脆紅無數壓闌干。

### 題王舜畊畫

翠壁丹厓淡夕曛。往來麋鹿自成羣。仙家住在空青外。只隔桃花一片雲。

### 秋夜

秋聲溢耳不堪聽。燕坐高齋戶半扃。霽月滿窗明似畫。梧桐如雨下空庭。

### 肅靖王真淤四首

王恭王貢鏞之子。太祖來孫。莊王模玄孫。成化中封世子。嘉靖五年薨。以子定王弼。枕襲王追諡。  
有星海集。

名山藏。靖王真淤。博雅好文。善爲詩。

列朝詩集靖王詩調高古言邊塞事尤感慨有意

塞上

李陵望國臺猶在。蔡琰悲笳怨未窮。獵騎遙遙入霜霧。鷓鴣泉外夕陽紅。  
受降城外單于獵。溫宿營邊漢使過。強欲從軍事鞍馬。馮唐已老復如何。  
遠出漁陽北擊胡。將軍談笑挽雕弧。千金底購單于首。贖得沙場戰骨無。

徐渤筆精蕭藩靖王博雅善詩塞上曲遠出漁陽一篇有王龍標之致

春日田家

屋後青山門外溪。小橋遙接稻秧畦。人家遠近蒼煙裏。桑柘陰陰戴勝啼。

岷靖王彥汰一首

王莊王梗玄孫。太祖來孫。初封江陵王。弘治十三年襲封。嘉靖二十三年薨。

贈廖道南

夔比神仙翰苑清。更無荆棘向人生。覆甌名位稱良史。補袞才猷輔聖明。視草綵鸞揮翰集。宣麻棠鵲蹴花鳴。槐廳風靜聽鈴索。一室焚香愜素情。

藩憲王胤移三首



王惠王助潛之子安王孫簡王來孫太祖昴孫自號南山道人嘉靖五年封靈川王十年以懷王絕嗣進封二十年薨有清秋唱和集保和齋詩五卷

謝榛四溟詩話。靈王南山。素嗜談禪。詩亦妙悟。和懶雲上人韻曰。幽徑斷行蹤。浮圖對遠峯。結冰堅碧沼。凝雪老青松。雙樹下開講。千燈中現容。天空雨花徧。門有白雲封。使王摩詰見之。亦當心服。詩韻罕用脛字。胡曾洞庭湖絕句。魚龍吹浪水雲腥。造句儘佳。靈王夜雨頸聯。樹溼鴉羣重。雲低龍氣腥。格律尤勝。若甯獻王。臞仙。周靈王誠齋。雖皆嗜詩。相去懸絕矣。

聞陵川有警

猖獗山中寇。農桑殊可悲。黃巾還自敗。白馬竟何之。烏合枯林夕。魚遊沸鼎時。材官幾籌策。況有射雕兒。

送趙一卿僉憲之蜀

纔得相逢便欲行。維舟論別限嚴程。雲山遠隔黃牛峽。風雨深迷白帝城。斷石荒臺唐故壘。懸崖殘壁漢遺營。知君素有忠良節。過此甯無感慨情。

次李黃崖寄懷韻

西望關門道路長。十年萍梗歎行藏。夢中樽酒人如昨。天外鴻聲秋又涼。老去客身頻出塞。曉來衙吏罷升堂。商州更在千山裏。政簡看書懶下牀。

德平榮順王胤樞一首

王濬憲王弟。自號南岑道人。嘉靖三十七年封。萬歷十年薨。有集書樓稿。

四溟詩話。南山。南岑。伯仲齊名。

王鴻緒橫雲山人史。藎。德平王胤樾。淵鬱負儁才。與宗人衡府新樂王載璽。周府中尉睦禔。襄垣府俊暉。晉府康衢。秦府玉華。齊名。俊暉著五懷詩述其事。

贈別素愚上人

釋子來何處。廬山復太行。翻經淹歲月。補衲犯冰霜。浩劫塵緣盡。彌天覺路長。智珠原不染。好去照殊方。

趙康王厚煜二首

王成祖第三子。趙簡王高燧之來孫。自號枕易道人。正德十六年襲封。嘉靖三十九年薨。有居敬堂集。

田垞王文采麗都。延接士類。藻韻連翩。應教疊作。讀孫太初之集。恨不同時。奏謝茂秦之歌。擁姬出拜。至今談者津津。豔流口齒。斯極朱邱之風流。藝林之韻事也。

送句吳茂才願聖少北上

北去度滹沱。春風一騎過。入燕投刺少。留趙著書多。明月頻呼酒。青天獨放歌。他時望南國。湖上有煙蘿。

擬出塞

都護行邊日。胡天雪正飛。朝傳青海檄。暮解白登圍。龍虎行韜略。風雲入指揮。何當請長組。生繫犬戎歸。

蜀成王讓栩二首

王昭王賓瀚之子。太祖昴孫。正德五年襲封。嘉靖二十六年薨。有長春歲辰稿十六卷。

列朝詩集。蜀自獻王後。四葉皆有文集行世。昭王仁厚好儒術。孝宗皇帝賜詩。以河間禮樂。江夏忠勤爲比。王好學。手不釋卷。日觀經史。臨法書。作詩屬對。皆有程嬰。

擬古宮詞

睥睨鴉喧曙色明。麗譙隱隱盡鐘聲。各宮裝束焚香候。只恐君王道院行。

靜志居詩話。宮詞雖擬古。然只恐君王道院行。疑調永陵而作。

內池春水鴨頭綠。上苑晨花腥血紅。蜂蝶叢花鴛戲水。一齊著意向東風。

武岡保康王顯槐一首

王楚端王榮滅第三子。昭王來孫。太祖昴孫。嘉靖十七年封。萬歷十八年薨。有少鶴山人正續集

十六卷。

俞憲盛明百家詩。少鶴山人。雅善文墨。尤好詩歌。

送杜學諭擢國子先生

江天歲晚雪初晴。有客鳴珂上帝京。楚士久知宗杜佑。胄師今得見陽城。橋門壁水環經席。驛路梅花擁去旌。誰謂儒官稀樹立。熙朝冢宰頌文清。

潘宣王恬煥二首

王憲王次子。太祖仍孫。自號西屏道人。嘉靖二十一年襲封。萬歷十年薨。有綠筠軒稿四卷。

四溟詩話。西屏道人詩。辭雅氣暢。造詣不凡。

名山藏。宣王好學。工古文辭。妙於聲律。

寄懷小司馬郭一泉二首

在昔論文卽見知。幾年良晤信難期。停雲北極頻回首。落木西風獨賦詩。金鼎鹽梅般相業。玉階劍履漢官儀。君今選將清邊徼。畫省憂心退食遲。征驂別後幾登樓。極目山川憶舊遊。鼎鼎霜華寒已匝。冥冥雲物夕仍留。九關甲士圖功日。三輔丁男習戰秋。聞道天驕還北遁。萬年佳氣繞皇州。

鎮康恭裕王恬焯三首

王藩憲王第五子。自號西巖道人。嘉靖三十一年封。萬歷八年薨。有西巖漫稿。

四溟詩話。鎮康王西巖詩。最得盛唐格律。題宋參政瞻遠樓云。江流懸樹杪。山色到窗中。精拔有骨。陪國主謁瑩。途中有作云。仗劍浮煙破。旗衝過鳥翻。句法森嚴。何異沈宋。

送程太守存齋之任睢陽

八月一日天泱寥。使君南發馳星軺。雙旌何悠悠。五馬亦蕭蕭。駢筵出祖擁溪橋。橋邊楊柳垂長條。欲言

不言各踟躕。西風嫋嫋吹征袍。睢陽雄峙梁宋郊。兩歧五袴成歌謠。公衙寂寂畫簾捲。白日皎皎青天高。蹇余久欽道義重。與君況是金蘭交。一日不見心已思。詎忍咫尺千里遙。握手送君還留君。側身南望空鬱陶。

寄懷劉紫山侍御回自滇南

枕榔幾度感花開。鄉國傳書不易來。曾醉離亭牽我夢。因思佐郡識君才。滇南風壤三年盡。天北星槎萬里迴。遙望舊知秋欲杪。月明何處是行臺。

四月八日過昭覺禪院同諸宗丈賦得松字

石龕幡影閃金容。此日曾聞浴九龍。心印始歸香象迹。法輪更斷野狐宗。風傳鐘磬留空谷。天落雲霞拂古松。傑閣還登一西望。萬年佳氣饜諸峯。

安慶端懿王恬燿二首

王濬憲王第七子。自號西池道人。嘉靖三十七年封。萬歷二十二年薨。有嘉慶集。

四溟詩話。安慶王西池詩。奇崛有骨。善用險韻。譬如棧道馳馬。無異康衢。韓翃秋夜卽事。星河秋一雁。砧杵夜千家。西池重九。

○一夜樹聲喧一枕。秋色冷千家。此聯與韓出一杼。織組自別。

潛安詩鈔前編。西池道人樂善忘勢。海內名人樂與之游。立葆真亭。八子會。每當佳辰。招呼宴集。彈琴對弈。飲酒賦詩。

田按西池攬秀閣。中秋宴集詩。擲辭走天馬。吐論集人龍。想見賓客之盛。

送月泉上人歸南海

閒身無所繫。江海信孤帆。石上留金偈。人間祕玉函。天開達摩井。雲護普陀巖。誰復爲禪侶。相依松與杉。送程太守存齋之任睢州

秋滿橋梁柳尙垂。一樽千里別君時。雲霄盛世看騰踏。風雨茅堂幾夢思。汴水澄清知善政。嵩山迢遞入新詩。懷人儻有瓊瑤字。回首天涯雁正飛。

遼庶人憲燻一首

庶人遼莊王致格子。簡王昺孫。太祖仍孫。初封句容王。嘉靖十九年襲封。隆慶二年。以罪降庶人。國除。有味祕草堂集。

朱國禎湧幢小品。遼王國於荊州府。嘉靖中。庶人憲燻。聰明絕世。行多縱恣。當之以叛劾。疏中有觀兵八里山之說。傅致其獄。過也。被執月餘。飲酒賦詩。了不爲意。行之日。表辭毛太妃。血淚淋漓。全表皆溼。表既上。如故也。惟語袁太守曰。公知吾好文墨。多致文房四寶去。見者無不哀之。

錢希言遼邸紀聞。世廟時。遼邸最盛。宮室苑囿。擊伎狗馬之樂。甲於諸藩。而王亦風流好文。音曲詞章。曩虛擊鞠。靡不狎弄。離宮別館。霧環雲蒸。舞榭歌樓。金鋪繡澀。於是四方之墨卿賦客。博徒酒人。黃冠羽服。驥子魚文之流。無不騰集其座上矣。世宗宴駕。國亦遂除。遼王好營宮室。置亭院二十餘區。以美人鐘鼓充之。其名有四樓。西宮。曲室。華房。太乙。竹宮。有月榭。紅房。花塢。藥圃。雪溪。冰室。爲鵲。虎園。又有塔橋。龍口。西嚮。草湖。藥珠洞。宮人斜。諸處。縣廷包絡。參差蔽虧。琪花瑤草。異獸文禽。靡不畢致。王日與諸名士觴詠其中。是時信州宋登春。吾吳顧聖少諸君。凡數十輩。皆爲王門珠履。輿故荆守徐宗伯。公倡和上元諸曲。

徐有四宮隱隱出鸞籟之句傳誦一時。然遼王雅工詩賦，尤嗜宮商，其自製小詞，豔曲雜劇傳奇，最稱獨步。有春風十調、唾窗絨、誤歸期、玉闌干、金兒弄丸記，皆極婉麗才情。尋後安置鳳陽，又編撰寶花聲諸詞數百闕，流傳江表，含思淒楚，不減南唐。後主春意闌珊，至今章華臺前老妓，半是流落宮人，猶能彈出篋篋絃上，一曲伊州淚萬行也。

田按庶人所著詩，有名庚申稿者。徐學謨序云：逸材命世，藉藉今古，對客揮毫，一伸紙卽千數百言立就。一時騷壇之士莫能難，今檢學謨海隅集云：此序爲某宗人著，蓋禍發後削其名也。方禍未發時，鵝池生宋登春爲士門客，時永陵好道，憲節以崇事玄教，封爲清微忠教真人。登春作宮中行樂詞云：小紅亭子白闌干，入道宮娥玉作冠。袖出青梅彈鶴鷗，銀瓶滿注蔗漿寒。碧殿春深瑤草肥，美人對月舞羅衣。夜來不作青鸞夢，化作彩雲何處飛。玉輦春遊夜未央，紫衣侍史謾焚香。黃金鎖合鸞鷲殿，無限春風到海棠。琉璃硯水黃金瓶，十樣鸞箋寫道經。太乙紫壇朝帝罷，蕊珠深殿彩花馨。又紀南樂應教云：沙市多新館，章華餘舊臺。細雲蕭岸柳，殘雪照江梅。楚舞花鈿麗，吳歛寶瑟催。清尊宜落日，作賦子雲才。又賀雪侍燕應教云：狐白煖蒙茸，當歌集上公。春藏金屋裏，僊隱玉壺中。送酒青樓妓，焚香白玉童。錦屏寒不入，只許隔簾櫳。可謂一時詞客之雄，及禍作，登春作遼小紀於憲嬭無恕詞，失詩人忠厚之旨矣。

### 望龍山

桓公展高宴，乃在龍山巔。大會文武士，冠蓋相周旋。誰知孟參軍，天質任自然。墮帽了不驚，請筆詞翩翩。茲風已千載，朝市幾遞遷。山前有故邑，化作陌與阡。我欲矯雙鳥，荆棘誰可攀。延佇發長嘅，萬壑生塞煙。

### 益莊王厚燁一首

王端王祐檳子，憲宗孫嘉靖二十年襲封，三十五年薨，有勿齋集詠史詩。

登山

屏迹書巢寂寞間。監輿乘輿遠登山。山雲挾雨忙飛去。不得逍遙共我閒。

潘定王<sup>聖堯</sup>一首

王宣王子太祖雲孫。萬歷十二年襲封。有修業堂。崇玉山房二稿。

潞安詩抄前編。王博學贈通詩學晉魏。

寒食曉行

輕軒衝曉色。迢遞柳溪邊。野闊羣山小。雲低片雨懸。杏花初熟酒。榆火乍浮煙。寂歷曉鶯處。傷春似舊年。

靖安王新環一首

王晉靖王曾孫。太祖雲孫。萬歷十年襲封。

名山藏。靖安王表赫。有道氣。能詩。子恭懿。王知楷。孫今王新環。三世俱能詩。

元夜懷易海洲中丞

淡月來深院。寒煙接暮天。華燈明綺席。綠酒醉流年。孤影梅花伴。相思春草邊。遙知燕市裏。酬和白雲篇。

穀城王常瀛一首

王吉端王孫。簡王來孫。英宗弟孫。萬歷二十四年襲封。



冬日陳達父對飲

寒色侵池滿。簾鉤捲夜長。鐘疏三徑月。葉散一林霜。茗好詩脾健。盧呼酒力強。縱談銷絳蠟。縹緲坐焚香。



# 明詩紀事卷二下

## 甲籤

朱安瀛一首

安瀛周定王櫛玄孫

田按史稱將軍安瀛素精名理。延納詞人。聲譽大著。與中尉陸掣齊名。人稱陸掣爲大山安瀛爲小山安瀛。詩惜不多見。

送馮參將赴陝西

仗鉞仍分陝。乘時復請纓。聲名歸大樹。威武重長城。電掣蒼龍劍。風翻白虎旌。塞塵當一掃。萬里可橫行。

朱陸掣二首

陸掣字灌甫。號西亭。周定王六世孫。封鎮國中尉。萬曆中舉宗正。有陂上集二十卷。

胡應麟詩蔽明宗室。攻古文詞者。嘉隆間。惟灌父最博洽。饒著述。余髫歲卽與交。豫章用晦先鳴。諸子勃起。貞言宗良。與余酬復特久。一時饒爽名家。未易屈指盡也。

列朝詩集。灌甫被服儒素。覃精經學。從河洛間宿儒遊。奉手摠衣。執經函丈。受禮於睢陽許先章。分句釋。辨析疑義。達旦不寐。三月而盡其學。年二十通五經。尤達於易春秋。家故饒貲財。僮奴數百人。皆逐羸車屑麥。執業自給。逐十一之利。其家益大起。

訪購圖籍請接賓客。傾身遊貴顯間。通懷好士。內行修潔。築室東陂之上。延招學徒。與分苜蓿。用是名聲籍甚。萬歷初。舉文行卓異。爲周藩宗正。十餘年。國中大製作。皆出其手。修河南通志。撰中州人物志。中州之文獻徵焉。謂本朝經學一稟宋儒。古人經解殘闕。放失訪求。海內通儒。繕寫藏弃。若李鼎祚易解。張洽春秋傳。皆序而傳之。丁丑領宗學。約宗生以三六九日。午前講易詩書。午後講春秋禮記。雖盛暑寒不輟。命諸生刺舉同異。撰五經稽疑若干卷。授經圖及傳四卷。觀陶九成輟耕錄。載前元十九帝統系。作大明帝系世表一卷。周國世系表一卷。感建文革除記錄失實。作遜國記。稟忠錄五卷。考史記以來謚法。作較定謚法一卷。合沈約吳械韻。舉正誤繆。撰韻譜五卷。其詩文有陂上集二十卷。文尤典雅可誦。有明之宗室。靈園比眉間平。而灌甫媲美子政。洵昭代之盛事。唐宋所希觀也。海內藏書之富。近代惟江都葛氏。章邱李氏。灌甫傾貲購之。竭四十年之力。做唐人四部法。用各色牙籤識別。凡一萬二千五百六十卷。起萬卷堂。諷誦其中。圈點離勸。丹鉛歷然。其子勤藝。號竹居。亦嗜書。收藏益富。余從中牟張氏表。鈔得其書目。武林卓爾康。爲學官於汴。借鈔得數十帙。未竟而罷。汴亡之後。陂上之充棟插架者。漂蕩於洪流怒濤。可勝歎哉。

### 陂上答潘笠江

陂開浚野東。堂接夷門道。聊用安卑棲。敢云慕高蹈。良辰適在茲。蓑裳一登眺。苔徑何縈紆。葭洲亦窈窕。嶼雲斷復連。林日隱仍曜。溪鳥自飛翻。沙禽相叫嘯。身同北渚吟。情豈南窗傲。酌桂靡與歡。擷蘭徒盈抱。賴歌郢中篇。庶以永所好。

### 晚秋過相國寺懷然上人

與君結靜因。回首俱陳迹。緬懷山中遊。歲景倏已夕。秋颿颿空林。澹月來寒石。兀坐亦何言。含情念疇昔。

朱華園一首

華園字仲叔。楚國王孫。有梅湖、桃谿二集。

廖元度楚風補。仲叔敦敏好學。崇禎癸未三月。夢遊異境。見石壁有詩。告親友曰。時危矣。去之可也。遂隱桃谿。易名陶范公。別號五湖長。

送陳法瞻之留都

將軍奇俠天下聞。醉餘指顧生風雲。以劍爲書自神絕。波掣勁敵千人軍。曩歲戰黔獲小醜。拂衣里閭羞言勳。小鈴塞衛條千里。然諾真堪托生死。故人急難遠相聞。犯暑南行爲經紀。壯君意氣爲君歌。翁伯于君何足多。

朱承綵一首

承綵字國華。齊王孫。

列朝詩集。齊藩宗支散居金陵。高帝子孫於今爲庶。國華獨以文彩風流。厚自標置。掉鞅詩壇。鼓吹騷雅。萬歷甲辰中秋。開大社於金陵。會海內名士。張幼于輩。分賦。壇簡百二十人。秦淮伎女。馬湘蘭以下四十餘人。緝文墨。理絃歌。承平盛事。白下人至今豔稱之。其詩亦殊清拔。天迴孤帆沒。江空獨雁寒。所謂送別登樓。俱堪淚下者也。

春暮集巨源弟羣鷗閣

客來情不淺。月白樹難藏。開閣驚春暮。傳杯引興長。水清魚戲藻。花落蝶愁香。翦燭西窗裏。無妨入醉鄉。

朱觀樞一首

觀樞字中立。鉅野僖順王玄孫。魯荒王檀六世孫。封鎮國中尉。有濟美堂稿。

宋弼山左明詩鈔。中立所選海嶽靈秀集。後附二藩詩一卷。則其父子作也。自序云。岱宗東盤。溟渤襟壑。鉅野茫茫。靈光蕩蕩。當奎婁危室之奧。固宇內靈秀之區。三朝以來。名家疊出。大雅聿振。予採成二十餘卷。略述人物出處。品格優劣。今頗有其本。簡擇頗精。

梅墩

誰將庾嶺梅。栽傍草玄宅。一夢入羅浮。覺來山月白。

朱頤媿十三首

頤媿字江亭。魯荒王八世孫。有市隱堂集六卷。

田按江亭詩音節高亮。史稱鉅野中尉頤媿。聲詩清拔。所著有赤霞館集。余檢江亭市隱堂集。有喜聞赤霞館得二鶴。展九日。集赤霞館對雨。諸詩。蓋同時唱和之作也。江亭名不甚著。余特廣爲甄錄。與世共賞之。

和村居感遇

一朝脫塵鞅。四海任遨遊。採藥尋仙去。岱宗爲我留。西望咸陽宮。寂寞成荒邱。興亡固有數。貧賤何足憂。歸來閉柴關。編簡細研求。埽石臥白雲。銜盃歌四休。

至後齋居述懷

昔登蘇門山。獨發孫生嘯。悵悵青霞人。披襟可同調。落月照林薄。迴風吹海嶠。相思轉陳迹。俛仰憶悲眺。  
述懷

柴門無客過。幽興與誰同。竹色凌殘雪。梅香度晚風。歲時雙醉眼。天地一衰翁。回首浮雲態。須臾事事空。  
春日臥病答蚘竅兄招飲

相如多病日。不遂免園遊。人惜耽詩債。花憐負酒甌。那堪曲水興。尙念野人儔。燕子知春社。銜泥去玉樓。

掩門

物序秋將半。西風各掩門。人情向黃菊。霜色悼芳蓀。白日豺狼鬪。清宵鼓角喧。時光須自遣。對月且開樽。

除夕雪中有感答一敬姪

寂寂陵谷變。悠悠歲序遷。檻梅融臘雪。岸柳帶春煙。藥餌扶衰病。琴樽送老年。眼前小兒女。時態鬪鮮妍。

冬日感懷

嗜酒貧爲病。耽詩狂作魔。醉來還自舞。醒後復長歌。天地身將老。風塵鬢欲皤。吾生今已矣。歲月任蹉跎。

杜陵臺餞送林長卿之金陵

臺古春深草木稠。驪歌忽動使人愁。雲開淮浦三山出。江抱石城二水流。別後夢魂依魯甸。燈前風雨看

吳鉤。憐君年少青雲器。正是鷗鷗奮翼秋。

迎春詞

越羅新翦製春衣。廣袖長紳白練垂。怪底誰家遊冶子。輕敲紈扇唱春詞。

絕句

茶烹竹葉宜興錦。酒泛松花鸚鵡卮。醉後園林遊目處。陰陰桑柘雨晴時。

塞下曲二首

邊烽夜照塞門開。漢將秋深打獵回。後騎尙屯平樂館。前軍已過李陵臺。  
煙塵不動紫荆關。刁斗無聲士馬閒。貂帽錦裘結束好。將軍雪裏射鵬還。

海棠軒

北軒軒外春光好。點染臙脂半未開。醉倚東風似相識。挑燈載酒幾回來。

朱憲燮一首

憲燮字叔和。遼簡王植六世孫。封鎮國將軍。有哀黍離詩。

真人府

叢桂崑幽玉露寒。欲探鴻寶憶劉安。雲中雞犬無消息。歲歲青苔護石壇。

田按真人遼王憲燮也。



朱儼鏹一首

儼鏹字啓宇。遼簡王八世孫。有句曲山人詩。

東灣草堂隱居

明月在天天在水。水光天氣涵網縕。隔鄰清杵數聲急。遶屋寒蛩一夜喧。有時獨坐自垂釣。無事杖藜還扣門。眼前落葉聚復散。石上看雲安所論。

朱拱樋二首

拱樋字匡南。建安簡定王孫。甯獻王權五世孫。封奉國將軍。有瑞鶴堂集。爽臺臺各二卷。

寄環浦鄭公

灑淚三年別。論心千里同。斷鴻閩海闊。落木楚天空。憂世存孤議。傳經抗古風。無緣從杖屨。吟嘯武夷中。

輓沈潯州禹文

沈約元多病。如何事遠遊。一麾才欲展。萬里瘴先投。茂苑猿空怨。蒼梧雲更愁。旅魂招未得。蕭索不勝秋。

朱多憤五首

多憤字宗良。瑞昌恭僖王玄孫。甯獻王六世孫。封鎮國中尉。有國香集。

王世貞弇州山人摘彙。朱宗良石蘭館彙。氣清調爽。神完體舒。用事切而雅。入字峻而穩。運思深而不刻。結法適而有餘味。

筆精國朝宗藩之詩。甯府爲盛。諸王孫以詩鳴者。多。烺。多。憤。其著者也。多。烺。絕句清逸。多。憤。屬對精工。如太室出雲來。署裏黃河如帶挂城頭。關山曉月趨三輔。鴻雁秋霜度九河。路經軒后臨戎坂。山接高歡避暑宮。翩翩爾雅無。紈袴習氣。書史會要。朱多。憤。以辭賦名。草書宗孫虔。禮筆法茂美。

列朝詩集。多。憤。博雅好修。與多。燧。齊名。晚益折節。有令譽。掖垣薦。堪宗正者。於南昌首舉宗良。後病痿。不廢吟咏。鴻聲亮節。信朱邸之雋也。

田按明藩王之工詩者。當以秦簡王誠。泳爲稱首。王孫之工詩者。當以瑞昌中尉多。憤。爲稱首。王弇州云。每得中尉一番詩。輒復一番奇進。才情融美。格意朗暢。朱邸中那復有斯人。自非溢美語。中尉詩。初名石蘭館藥。弇州題爲國秀。又改題國香。見弇州國香集序。

贈余無旦並寄胡茂承

分藩豫章郡。地勝有餘樂。爽氣浮雲峯。江流帶高郭。心賞希良朋。毫素獲所托。胡生實燕婉。十載阻京洛。每睹鴻雁賓。永歎遠行客。余子璠璵美。抗迹戀邱壑。載誦招隱篇。清風振叢薄。

蘇公祠

西蜀藏名士。東湖托隱居。野雲寒織屨。春雨曉栽蔬。心爲踰垣苦。才甯濟世疏。悠然江海外。不報故人書。

滕王閣

覆檻飛臺古閣雄。疏簾高棟廠天風。彩雲尙想霓旌駐。嬌鳥如悲翠琯空。江送波濤來浩渺。雨移巖岫入

溟濛丹梯更峙巴山外。詞客千秋興未窮。

玉隆萬壽宮

西山迢遞隱仙宮。誰信人間有路通。忽覩樓臺蒼靄外。似聞雞犬白雲中。石幢苔滅三天字。磻道霜凋百尺楓。靈跡祇餘丹井在。清秋吟望意無窮。

酬羅敬叔

病裏送君遊白嶽。歸來對我惜蒼顏。移家只是湖邊好。莫問茱萸第幾灣。

朱多炆八首

多炆字貞吉。弋陽僖順王曾孫。甯獻王六世孫。封奉國將軍。卒後私諡清敏先生。有五游、勸游諸集。

姚旅謫書。豫章王孫貞吉。負時名。慕孫太初。亦易姓名曰來相如。字不疑。浪迹吳越。其詩如帆衝山果落。棹惹浪花腥。野竹雲千頃。田桑雨一犁。野澗蘋花積。田家芋葉香。蠟屐黏香絮。單衣繡雨痕。山泉供水樂。秋葉逞春容。又七言如林連北郭藏春色。水過東家作雨聲。皆興到語。

筆精。貞吉王孫。過餘千詩云。餘千城頭雲泊天。琵琶洲下水如弦。推篷理詠隨州句。落日平沙似往年。謝在杭宿弋陽云。羣峯迴合俯清溪。寂寞荒城古渡西。惟有女牆秋月在。只今猶照夜烏啼。二詩皆用劉隨州句。畧無痕迹。書史會要。貞吉詩才警敏。行草宗米南宮。雜以古字。自成一體。

畫史會要多姪精繪事。見古人墨蹟。一再臨之。如出其手。山水得二米家法。寫生更妙。

田按真吉王孫詩才清粹。徐興公稱其絕句。固是玄賞。

寄邱二十二謙之

邱郎一官一再左。手板三投三不可。進退艱如躑躅羊。功名澀似葳蕤瑣。憶昔與子初結歡。觴詠澣濯章江千。別來忽下閩中命。五馬重歌蜀道難。閩中君家舊治域。父子分符如畫一。蒼舊摩挲去後碑。少年捃拾毛中蹟。縱有詩名天地間。那能相見一開顏。我擅秦聲君楚舞。醉望城頭千仞山。君當彊仕不得意。我尚沈冥未知止。與君各自鬪身強。四十頭顱已如此。

遊百丈山聞余無旦過豫章闕展待先此奉寄

我住浮雲宮。君來天子障。尋山尋水各逍遙。看樹看雲重惆悵。谷口行歌日暮還。杖藜何處不青山。莫題鳳字朱門外。且聽鸞音半嶺間。

春日懷張羽士

言旋南嶽駕。又作薊門行。尊酒不爲別。河梁空復情。一官羈萬里。十口寄孤城。日暮春雲起。相思處處生。

問魏甫姪疾

海上何人說禁方。科頭長似懶嵇康。穿林雨暗□煙綠。隔院風微藥草香。轉向病中憐故舊。誰從身後定

文章閉門不問春多少。靜看飛花墜滿床。

撥悶

雨暗春城十萬家。強搯髻几到棲鴉。峭風欲闕遊人屐。吹盡牆頭柰子花。

送梁傳之從襄陽將母南還

夫人城外漢江平。逐子南迴五兩輕。路出鄢邨頻雨雪。槎頭魚賤筍初生。

送王姬還芝城

蘼蕪芽碧柳絲黃。來往扁舟就沈郎。一掬宮亭清淺水。凌波不怨洛川長。

湖口縣

湖水澄清江水渾。江煙湖靄易黃昏。請看湖口江心月。一片寒光照縣門。

朱多燿一首

多燿字用晦。瑞昌榮安王曾孫。甯獻王六世孫。封奉國將軍。有朱用晦集。

田按用晦因南昌余日德入七子之社。王元美作續五子詩。元晦與焉。宗良、貞吉得交元美。自用晦始。元美所謂豫章諸王孫。賴足下先驅。異時風流不減鄴下也。

滕王閣

滕王閣倚楚江干。公子乘春一駐鞍。北去波光浮錦席。西來山色擁雕欄。冥鴻萬里飛雲斷。芳草三洲落照寒。已是大夫工授簡。賦成兼使和人難。

朱多燠一首

多燠字知白。甯惠王第四子。石城恭靖王奠塔之玄孫。

秋日社集

躡步出郭門。涼沙朗朝日。池邇入叢林。花宮眩丹漆。巍巍豫章臺。萬木四排比。音玉。從白香山讀。高讌集友于。討論及刊述。清風吹素襟。古調和瑤瑟。會心豈在遠。快意亦多術。遙睇天際帆。翩翩若風乙。

靜志居詩話。南昌郭外有龍光寺。萬曆乙卯二月。豫章詩人結社于此。宗子與者十人。知白之外。則宜春王孫謀。劉文翰。瑞昌王孫謀。雅彥叔。石城王孫謀。瓊豐儀。謀圭。禹錫。謀琦。誠父。謀堡。潘甫。謀壘。辟疆。建安王孫謀。穀更生。謀望。禹卿。謀劃。楫。其詩曰。龍光社草。

朱謀璋四首

謀璋字鬱儀。石城恭靖王來孫。甯獻王七世孫。封鎮國中尉。萬曆二十二年。管理石城王府事。卒。私諡貞靜先生。有枳園近稿。

鄭仲夔耳新詩有集唐集。古余友朱鬱儀。諷古十首。乃更集諸子。鑄鑄之巧。妙極自然。又閏三月。飲龍沙詩。且極天縱娛。相將傾桂醕。蓋歷家謂閏月爲天縱也。鬱儀博綜多聞。著述之富。戶倍中壘。每館閣中。遇故事隱僻者。貽書相問。裁答如響。著書百

有十二種。手自繕寫。稿至數易。易篋前二日。猶與諸子說易。指示詩文宗尙。是夕有星光大如斗墜里中。樓鳥皆驚。及卒。南州人士私謚貞靜先生。

周亮工書影。西蜀楊升庵太史著書至二百餘種。豫章朱鬱儀中尉著書至一百十二種。當時曾未聞有茂陵之求。張天如雖一時名流。然無多撰著。當時至見之章奏。求其遺書。人有幸有不幸如此。

### 滕王閣

銀牀冰井久荒蕪。豈若君王觀閣殊。六月凌歊無暑氣。千年選勝甲名都。河山雨過明如畫。草樹煙消綠似鋪。多少詞人憑檻意。依然汾晉一碑孤。

### 元夕曲三首

一夜春歸花柳新。笙歌五里踏朱塵。停車試問來遊女。誰似天河欲渡人。六十餘年白髮生。眼中元夕幾回晴。江南不是無燈火。取盡脂膏照上京。少年不解眸牢愁。月夕花朝結伴遊。今日故人零落盡。祇留春色到南州。

露書朱鬱儀元夕曲皆以舊照寫新意所以爲佳。

### 朱謀誓三首

謀誓字康侯。更字公退。甯獻王七世孫。有羔雁淹留。蕪城巾車四集。

露書甯昌王孫多稱詩。而康侯拔出。康侯刻稿甚多。余愛其送謝在杭分守大理詩。南詔分司擁傳賒。嚴城保障建高牙。漢兵

據險皆屯柵。蠻族依巖卽住家。布穀曉唳郵店樹。刺桐春發訟庭花。君恩懷遠多寬政。公暇吟詩早放衙。

列朝詩集。公退少而英敏。讀書修詞。踵鬱儀之後塵。結廬蛟溪。躬耕賦詩。郊居耕釣之作。詞旨婉約。有唐溫許。宋陸游之流風。

舊宮詞

女牆橫截鍾山麓。子城十里空其腹。老宮監守西上門。日見宮中春樹綠。當年玉座遷北平。燕麥多從輦  
路生。太液煙波空弔影。未央鐘鼓不聞聲。二百年來萬民樂。文武諸司皆臥閣。當年內庫掃梁塵。六月重  
門啓魚鑰。市人身替羽林軍。偷見蓬萊五色雲。枯沼頽垣容易入。千門萬戶杳難分。驚看墀草潛狐兔。武  
英殿接西宮路。赤闌楊柳樹長生。畫棟芙蓉花尙吐。別有銅駝扉半開。人傳高后燕居來。五龍蟠結朝眞  
閣。七寶莊嚴禮佛臺。寂寂文牕罨蛛網。至今海燕巢於上。籥口銜將紫陌泥。飛身立在銅仙掌。日暮中官  
點禁兵。周廬依舊閉重城。宮樹鴉嘯金瓊下。年年只放內家行。

甲寅春日江村卽事

自喜幽居耳目清。閒中歲月與天爭。占風網客知魚信。較雨田家驗鵲聲。梅潤上絃琴緩柱。草香侵局奕  
開枰。沙邊引步看流水。何處昏鐘報曉晴。

金陵雜咏

南國金湯據石頭。千年人說帝王州。驚聞戰士屯朱雀。枉殺將軍怨白鳩。風煖香車盈廣陌。月明絃管在



高樓傷心一派秦淮水。處處垂楊似莫愁。

朱謀堯二首

謀堯字巍甫。石城王孫。有享帚集六卷。

田按巍亦與從弟佳父詩。合刻爲連枝集。巍甫詩五言如一別幾黃葉。相看兩白頭。七言如樹頭反照寒鴉色。花裏殘春倦鳥聲。匹馬路盤黃葉出。大江天與白雲遙。山將暝色疏煙接。樓射江光返照來。秋氣中人雙袂薄。雨聲入枕一燈殘。滿簪華髮銷塵事。一枕青山檢道書。城回沙口藏山寺。水落江心吐石灘。行邊錦樹粧秋色。夢裏青山薄宦情。皆佳句也。

六子詩錄二

烏衣羣謝遊。如君固名曹。歎鳳本千仞。稱驥豈一毛。風流不在茲。雪曲誰爲操。手持五嶽圖。欲將訪盧敖。

貞吉宗叔

吾宗有大阮。國中稱達賢。興至弄柔毫。勢若銀鈎連。入望鬱紫氣。在聽聞朱絃。往往出佳篇。何人堪當前。

宗良宗叔

朱謀堯四首

謀堯字佳父。石城王孫。有擊轅稿六卷。

田按佳父詩。瓣香宋人。於陸放翁爲近。

春日閒居

門外雙溪引。城邊一徑斜。春光欺病客。山色戀貧家。高樹留殘照。東風過落花。晝長除鳥語。庭院寂無譁。  
寄答鄔汝翼山人

姓名何處得君知。一札經年愧報遲。懶去已成中散癖。詩來應作郢人疑。各天明月三秋意。萬里西風兩鬢絲。搖落此時無以贈。白雲江上不堪持。

春日閒居

心死如灰不復然。閉門踪跡儼遊禪。課兒種樹娛衰日。與客看花憶舊年。酒熟有時還自酌。詩成無意向人傳。閒居一任春來去。又聽鶯聲到耳邊。

春日感懷

無復重調綠綺琴。關情誰聽白頭吟。難乾薄俗千行淚。空碎窮交一寸心。倚杖園林鳴鳥變。閉門風雨落花深。感時對酒那成醉。人老春殘總不禁。

朱謀暉二首

謀暉奉國將軍多炆子有集

列朝詩集。謀暉效其父。變姓名爲來觀。字子魚。出遊三湘吳越間。有集行世。湯若士爲敘。

露書。來子魚。貞吉王孫長公也。喜游好事者。選其詩與孫太初。貞吉。謂之明宗三逸。

白下集沈生子明府席上賦得春草

芳杜奪幽色。秦淮客路遙。青連邀笛步。綠鎖賽工橋。柔雨生三徑。殘煙認六朝。夢歸南浦裏。幾箇別魂銷。疾愈寄友作

深冬惜病顏。幾日望春還。門外草初出。窗中人轉閒。餘生聊住郭。不死會尋山。待到桃花發。相期天姥間。朱謀埏一首

謀埏甯國王孫。

登滕王閣

帝子杳何處。樓臺猶大堤。江清二水合。日暝衆山低。畫棟生蛛網。雕甍有燕泥。不勝懷古思。春色遠萋萋。

朱統銓一首

統銓字夢得。中尉謀埏子。崇禎甲戌進士。官行人。

黃雲師江西人物志。統銓詩淡遠高古。稿燬於兵。不傳。

靜志居詩話。明初舊典。宗室子不與內外銓除。後因御史李日宣等所請。擬祖訓換授之法。言皇族宜通仕籍。得旨允行。秦王孫子斗詩云。爵人本至公。立法無頗偏。大訓手自訂。百度何森然。郡王有孫子。所司驗才賢。換授準任用。升轉遵常銓。諒哉二柱史。抗章排拘攣。先帝展科目。今皇命試官。椅桐委黜陟。被以朱絲絃。詞驕在外殿。第以珊瑚鞭。蓋紀其事也。天啓辛酉。晉藩慶成溫穆王表桐之曾孫慎蓋始舉辛酉山西鄉試。明年壬戌。賜同進士出身。至崇禎戊辰。甯藩瑞昌王孫統飾由進士改庶

吉士自後甲戌則蜀藩奉鉞甯藩統鉉鉉謀璋子也丁丑則甯藩統鑽統鏢庚辰則周藩朝壘在鉞甯藩統鉉癸未則代藩鼎  
婆廷增甯藩統鏢議汴皆以宗支取甲科

滕王閣留別同社

春風吹雁去南天。又促孤縱遠入燕。高閣喜從名士飲。輕裝仍附賈人船。江花伴我程千里。雲樹添君賦  
幾篇。只有詩情元不隔。相思能到彩毫邊。

朱統鉉一首

統鉉甯國王孫

晤茶山寺僧

因緣初地三生石。問訊名山四品泉。僧借茶經高說法。客依蓮社近逃禪。清空翠滴銀床滿。爽氣苔涵紫  
筍鮮。塵界黎元消渴甚。願將甘露灑無邊。

朱統嶮一首

統嶮甯國王孫

過東林訪三昧法師

偶來看瀑布。隨意過東林。問法蓮花白。安禪竹葉深。泉流千壑響。雲定一潭陰。嘯詠清溪上。翛然淨俗襟。

朱容重一首

容重字子莊甯獻王九世孫封奉國中尉有初吟草

張庚畫徵錄子莊隱居南昌鬱洲善蘭竹小品

輓徐巨源先輩

亂後誅茅構草亭山中閒散久窮經文章自我開生面寰海推君作典型夜雨暗淒高士宅寒雲低掩少微星清尊無復黃花約極目何堪涕泗零

朱胤梢三首

胤梢字遜軒陵川王孫有集

七哀詩

有引錄二

萬歷三年甲戌冬宣大修邊三晉受役民兵四千餘人而死是役者千五百有奇乃爲夫婦之詞凡七章命曰七哀取古題以記今事董斯役者可聞而念之也

長城萬里連雲開去年曾築今已頽黃沙滿眼更何處驅逐遠過單于臺前負土囊後騎催腹空肉破誰能來嗚呼父母不我哀

朔風倒吹天雨雪杵聲橐橐何時歇別時相約秋早歸豈料無衣骨將折人生有命向誰說河水濺濺爲

嗚咽。嗚呼南望心腸絕。

擬閩仙絕句

雜樹已秋風。空山又斜景。杖策不逢人。獨行潭底影。

四溟詩話。遜軒子曰。凡作詩。貴識鋒犯。而最忌偏執。偏執不惟有焦勞之思。且失詩人優柔之旨。如賈島獨行潭底影。其詞意閑雅。必偶然得之。而難以句匹。當入五言古體。或入仄韻絕句。方見作手。而島積思三年。局於聲律。卒以數息樹邊身爲對。不知反爲前句之累。因勉成一絕云云。遜軒博學嗜詩。志在古雅。且得論詩之法。擬閩仙一絕。不下唐調。其頓悟也如此。

朱胤枏一首

胤枏字敬軒。清源莊簡王曾孫。有重瞳老人詩十二卷。

四溟詩話。敬軒詩冲澹自然。

次栗太行杆顧韻

城隅蒼小軒。車馬不聞喧。邱壑元規興。蓬蒿仲蔚園。君詩清可挹。吾道拙能存。何似歲星隱。常依金馬門。

朱胤枏一首

胤枏字誠軒。胤枏弟。

石山子

累石宜精舍。憑虛無古今。悠然倚杖興。重以愛山心。地轉仇池穴。天移王屋岑。主人得幽趣。何處更登臨。

朱恬焮一首

恬焮字達菴。沁水莊和王叔子。封鎮國將軍。有達菴集。

列朝詩集恬焮子輔國將軍理圻與理瓊理增理埒四人結社日課以詩濟國於是稱多才矣。

同玉源宗王過吳江郡藩別業

霽日風光麗。梁園草木深。鶯歌催酌酒。魚樂聽鳴琴。移席臨花隴。行廚傍竹林。賢王有佳興。留客正慇懃。

朱理圻六首

理圻字京甫。恬焮子。封輔國將軍。有怡真亭稿。

田按京甫詩多擬古。妙合音節。沁水王孫當首屈一指。

宛轉詞

秋夜長。碧水芙蓉香。錦囊瓊佩爲君解。象籠玉軫爲君將。歌宛轉。宛轉淒以清。願爲滄波月。夜夜舟中明。夜已深。幽怨繞清琴。渚亭斜月半江色。涼風淅淅哀猿鳴。歌宛轉。宛轉愁君去。願作琴上絃。朝朝在君御。大堤曲。

春江覆垂柳。日暮大堤頭。堤上繁華子。春風極冶遊。解珠邀漢女。戲馬入青樓。誰見煙波晚。偏令估客愁。春日行。

四運紛鱗次。寒暑亦相循。元冬聿云暮。忽焉代青春。青春始入東郊裏。一日芳菲幾千里。已看幽谷出鳴鶯。復見芳園映桃李。桃李葳蕤滿故枝。垂楊旖旎拂金隄。南橋公子乘春興。南浦行人恨別離。南浦南橋望何極。士女春遊遊不息。香車七寶度春風。駿馬千金踏春色。春色感人深。春風蕩客心。春日行將暮。春愁不可禁。若有人兮婉清揚。弄白日兮臨綺窗。感標梅之欲盡。悵佳期之非常。託春心於芳草。結春思乎垂楊。皋有蘭兮隰有杜。懷佳人兮心獨苦。惜嫵婉之莫同。悲年華之將暮。恐鷓鴣之先鳴。芳意萎兮靡顧。與君願作雙飛鸞。比翼逍遙乎天路。

擣衣曲

空階秋色慘。寒逼授衣時。搗練勞清夜。調砧動遠思。力隨斜月盡。聲逐晚風悲。七月邊城雪。閨中寄已遲。賦得葛巾

生平甘恬素。奇服從燕私。製巾翦絺綌。漉酒還著之。晚沐挂薜荔。曉出窺清池。優游泉石上。珥貂徒爾爲。朱瑛瑠一首

瑠瑠字純甫。沁水莊和王孫。封輔國將軍。有玉田集。

步虛詞

馭鶴辭三島。凌颿入九天。衣輕披翠羽。劍古佩龍泉。紫氣呈金籙。丹霞絢玉篇。遨遊過帝闕。容與木公前。



朱琯一詩

琯號玉溪。沁水莊和王孫。封輔國將軍。

賦得採桑秦氏女

青陽屬蠶候。采采及桑柔。秦女新粧出。光輝動陌頭。葉低嬌漫摘。樹隔語還羞。自有金貂婿。空勞五馬留。

朱琯一詩

琯號龍洲。沁水王孫。封奉國將軍。

送傅逸人遊關中

山人不可留。歸路思悠悠。仙掌丹霞出。函關紫氣浮。猿嘯秦樹晚。雁度隴雲秋。華嶽如堪隱。吾將從爾遊。

朱效鑿一首

效鑿字仲凝。琯圻子。封奉國將軍。有匪莪元攬齋。盤秀山房等集。

杪秋交光禪師程心蟾逸人見過東園

開士投蓮社。幽人就竹關。茶煙凝晚樹。木葉下寒山。定水禪心淨。歸雲客思閒。清言塵境外。何幸日追攀。

朱頌燭四首

頌燭字孔炎。唐定王棧六世孫。封鎮國中尉。有巨勝園集。

弇州山人續稿。孔炎詩調和致清。高處可步武摩詰。下亦不失錢劉。

田按孔炎博雅好收藏。書畫鼎彝。羅列座右。嘗出所藏唐人理帛圖。東坡山谷像。與王元美品題鑒別精審。不愧摩天王文孫。詩亦才藻翩翩。在甯國王孫宗良之次。

過族祖姑壽陽君主墓

高阜城西墓。荒涼臥石麟。青山猶似黛。金粉自成塵。花落梅粧在。鶯啼竹淚新。向來蕭館月。不照夜臺人。

寄歐楨伯水曹

聞醉金陵酒。高歌李白樓。書來牛渚夕。賦罷鳳臺秋。徑竹裁青簡。江花照綺裘。從來何水部。頭白尙風流。

山中送龔美

龍伯祠前白日斜。山中七日飯胡麻。送君最愛春潭水。流出東風玉礪花。

金谷園

花落樓空委翠塵。千秋明月恨長新。西風原上羣芳歇。獨有芙蓉似美人。

朱器封二首

器封字子厚。碩爨子。封輔國中尉。有巢園集。

弇州山人續稿。子厚王孫。天質穎秀。神明煥發。雖生王家。而早探竹素。不染愛樂。故所撰朗朗郁郁。乃爾。王世懋奉常集。子厚樂府諸解。莽莽蒼蒼。絕無今人一語。五七言律。用事奧博。間有未融。

均州樂

臨江賈人黃篋船。澆澆青油篙刺天。下船上岸買魚酒。二八當壚誇數錢。煙縈羅幌春將晚。白日銜山不思返。珠簾紅袖影傴僂。樓上明粧樓下波。沙棠樹上嬌春鳥。月出平江齊唱歌。

寄田子藝

芙蓉搖落寄何遲。遠道猶涵玉露滋。山遠穆陵秋蟲蠹。月明瀨水夜離離。繡經臺畔一燈寂。搗鼓樓前雙棹悲。無奈西風吹病骨。因君將賦五游詩。

朱常注一首

常注字幼良。益端王四世孫。

田按益藩王孫常瀾。有防露館稿。如三春過大半。半在雨中過。落葉如秋雨。聽來不耐愁。姚園客稱其酸楚有致。附見於此。

山行

山谷風多花亂飛。飛花帶露溼人衣。晨炊茅店煙光動。散作浮雲入翠微。

朱慈愆一首

慈愆字火西。衡恭王六世孫。崇禎壬午舉人。

山左明詩抄。火西饒學問。善詩歌。闖寇陷青州。變姓名南遊。造次必持一觚。因自號大觚道人。

邱使君招同遊焦山

枯木堂中宿。重過不計年。烏嘯京口樹。月冷海門船。雲馭通三島。潮音應四禪。如何終碌碌。尋勝轉無緣。

# 明詩紀事卷三

## 甲籤

劉基四首

基字伯溫，青田人。元進士。吳元年授太史令。洪武元年拜御史中丞，兼太史令。三年授弘文館學士。封誠意伯。卒。正德中追諡文成。有覆瓿集二十四卷、寫情集四卷、犁眉公集五卷。

游潛夢蕉詩話：青田劉伯溫論者稱其乘時佐命之功，炳機克終之道，甚與漢子房相似。然或謂子房乃爲韓報讐，伯溫則營委事於元，其出處不免有間，是蓋未深論也。夫伯溫生元世，豈能超出天地外，不爲元人也哉？憂時痛國，每形於辭，如憫亂諸作，二三末句云：憫恨無人奏丹辰，側身北望淚滂沱。淮濱何日歌常武，腸斷嚴城戍鼓。天涯地角風塵滿，極目雲霄欲斷魂。江湖愁絕無家客，佇看青天淚眼昏。至如弔諸葛武侯、祖豫州、岳武穆諸賦，悲憤愁激，讀之使人躑躅思奮，其志可諒也。

胡應麟詩藪：國初越詩派昉劉伯溫，吳詩派昉高季迪，閩詩派昉林子羽，嶺南詩派昉於孫贄、仲衍。江右詩派昉於劉崧、子高、五家才子，咸足雄據一方，先驅當代。

田按：文成覆瓿集，元時作。犁眉公集，則入明後詩也。覆瓿遠勝犁眉，前人已有定論。文成爲開國文臣，故錄其入明應制之作，以爲壓卷。此集以紀事爲名，尋常共見之集，無事可紀，概所不錄。若人爲詩綜所未採，與探而未備者，意在補遺，不從此例。

平西蜀頌有序

臣聞天命真主。混一六合。必先有以爲之驅除。然後收拾以歸其籠。自古及今。同一揆矣。是故冬寒之極。必有陽春。激湍之下。必有深潭。大亂之後。必有大治。然也。元德旣衰。九土糜沸。鷓張狼顧。之豪。彌滿山澤。萬姓喁喁。無所籲告。天乃命我皇帝。肅將武威。代伐不道。故一伐而定荆湖。再伐而舉全吳。三伐而海甸廓清。四伐而東粵南閩。悉歸版圖。於是肆伐中原。拾宋掇秦。掣趙拔燕。兵鋒未至。聲聞先及。神讐鬼慄。匍匐俯伏。元菟青海。崑崙大漠。交趾鑿耳之國。罔不獻琛奉表。稽首闕下。無敢後者。獨明昇竊據巴蜀。雖遣使奉貢。而不去僞號。大臣皆請討之。皇帝憐其父沒子幼。數遣使招之不至。乃命將帥師伐之。洪武四年。大軍破瞿唐。殺其將某。郡邑鎮戍。望風送款。昇乃率其官屬。奉璽印。詣軍門請降。蓋自建國至是。凡五年。而天下一統。何其易耶。固知天命有在。而羣雄并起。爲之驅除也。臣基受恩深厚。無能補報。遙聞捷音。歡喜踴躍。不能自己。謹撰平西蜀頌一首。雖不足以贊揚聖德萬一。亦聊以寫葵藿向日之忱云爾。其辭曰。

惟彼蜀國。開自蠡叢。山川隔閩。華不通。金牛啓道。厥竅斯鑿。岷峨峩峩。始連井絡。秦以之霸。漢以之王。諸葛用之。震驚北方。劍閣倚天。瞿唐折地。仰不可攀。俯不可視。蠢茲羌戎。憑其險阻。罔知天命。大邦是拒。洸洸虎臣。受命於征。出師桓桓。如雷如霆。如雷如霆。天子之威。廟算先定。鬼神莫違。靈旗揮揮。指山摧。羌人失魂。慙若死灰。爰將其臣。奉其版籍。泥首軍門。面縛銜璧。六軍奏凱。聲動元黃。驚童白叟。蹈舞康莊。

四海會同豐年穰穰慶雲甘露自天降祥臣拜稽首受天之佑受天之佑天子萬壽

田按洪武三年遣將分道伐蜀征西將軍湯和與副將軍廖永忠率舟師浙江而上征虜前將軍傅友德以步騎出秦隴蜀將戰壽以兵阨險和永忠頓兵不能進而友德已自秦隴深入四年壽撤精銳禦友德留鄒興等守壘塘永忠乃先驅破壘塘闕入夔州和引兵繼之入重慶蜀主明昇降友德亦敗戴壽於漢州進圍成都壽亦降師還太祖面數和逗留罪和頓首謝乃免友德永忠受上賞太祖製平西蜀文所謂論將之功傳一廖次者也又云有臣在南家居栝蒼生而能文舉筆何難此頌當即應制作也但太祖文則分記傳廖之功基則渾括其詞其立言之體有不同爾

### 送張孟兼之山西按察司僉事任

平明集冠蓋。祖帳清江濱。天懸赫曦日。山湧崔嵬雲。大舶發中流。碧水龍鱗紋。宿雨霽初伏。川原無垢氛。修楊翦深綠。禾黍氣如饋。蘆荻響微風。鶴鶴鳴相聞。市酒雖云薄。情至心自醺。贈詩雖不多。芳意同蘭薰。丈夫樹遠業。兒女徒紛紛。農夫務去草。穉穉職所耘。蒼鷹司鷲擊。梟鸞慎其分。利劍斷犀兕。不數雀與貲。籌邊有廟算。樽俎茂奇勳。巍巍太行山。蒼翠浮細縵。萬古戒華戎。峻極通天文。老熊當道臥。氣響狼虎羣。引領望征旆。迢迢隔河汾。營平曜前烈。定遠揚後芬。制勝在兩楹。豈必疲三軍。功成早歸來。華袞昭玄纁。

田按青田與孝陵評論當時才人云。宋濂居首。其次臣不敢多讓。其次卽孟兼。孟兼之山西按察司僉事任也。宋景濂有序贈其行。青田此詩蓋同時作也。景濂序云。孟兼行哉。吾見輅車夕至。而封章朝上也。貪賕舞法吏。吾見望風畏。解印綬而避去也。雖然。鷲鳥之揚揚。不如威鳳之離離。狡狴之疆疆。不如祥麟之容容。刑法之堂堂。不如德化之雍雍。竹垞詩話謂此數言。足以箴孟兼之失。蓋孟兼負氣。厥後卒與吳印相訐論死。有愧此數言矣。

侍宴鍾山應制

清和天氣雨晴時。翠麥黃花夾路歧。萬里玉關馳露布。九霄金闕絢雲旗。龍文騷褭驂鸞輅。馬乳蒲萄入羽卮。衰老自慚無補報。叨陪儀鳳侍瑤池。

田按鍾山應制詩。汪朝宗云。松下鵬眠無客到。洞中龍出有雲從。茶煎紫筍逢支遁。藥煉丹砂羨葛洪。詹同文句云。瑤花如雨三千界。紫氣成龍五百年。風送香煙浮袞服。池涵樹影拂青天。孫西菴句云。三山遺迹投鯨海。五嶽齊肩擁帝宮。九成奏樂喧泉洞。百職聯班蹴磴苔。皆寫山中景物。青田此詩詞意迥別。蓋以侍宴時。蘭州方奏捷也。

送黃生莅祀福建

九重發政懷川嶽。使者承宣下紫宸。玉瓚黃流敷帝澤。碧雞金馬出神珍。風清五嶺煙霞肅。春到三山雨露勻。歸路武夷溪九曲。棠梨花映綠楊津。

田按宋景濂送黃贊禮涖祀閩省詩序云。洪武七年。皇帝御奉天殿。太常卿唐鐸奏曰。臣昔受明詔。天下行中書。其祠山川百神。或未致恪虔。宜令朝士澍之。浙。鄂。齊。汴。豫。章。已嘗奉命從事。若晉。若燕。陝。若閩。蜀。若廣東。嶺南。遠者七千里。近亦不下四三千。宜預遣使者。期以明年春二月集事。於是遴選奉常官屬。及儀曹主事。凡七人。時贊禮郎建安黃淵靜。實與其列。淵靜啓行。前御史中丞劉公伯溫。參知政事陶公中立。吏部尙書詹公同文。今禮部尙書牛公士良。各賦詩以爲贈。余檢劉子高集。有送贊禮郎黃淵靜。北平秋祀畢。還京詩云。聖王秩祀周寰宇。使者承宣莅北平。則淵靜奉使非一次矣。又高季迪青邱集。有送祠江濱使者詩云。源發岷峨萬里通。函香迢遞問齋宮。神馳白馬靈光近。祝奉元牲禮秩崇。驛下換船潮湧日。廟前沈璧水迴風。重煩使者徵多福。南國無疵黍稷豐。史稱洪武二年。命都督孫遇仙等十八人。祭天下嶽鎮海濱之神。三年。詔定嶽鎮海濱神。



號江稱南瀆大江之神。遣官以更定神號告其典。又重於監祀矣。

### 汪廣洋四首

廣洋太祖賜名也。字朝宗。高郵人。元進士。太祖召爲元帥府令史。江南行省提控。改照磨。擢都諫官。遷江南行省都事。進郎中。改中書省右司郎中。尋知驍騎衛事。拜江西參政。洪武初。山東平。命往撫納新附。召入爲中書省參政。尋參政陝西。擢右丞。以御史劾奏。放還鄉。再徙海南。尋召還。封忠勤伯。拜右丞相。左遷廣東參政。召爲御史大夫。復拜右丞相。坐貶廣南。於中途賜死。有鳳池吟稿十卷。

顧起綸國雅。汪朝宗詞新調閒。不失唐人大檢。至如倒藤懸宿鳥。絕壁挂晴霓。嶺樹垂紅葉。汀沙聚白鷗。樹密巢歸鳥。溪迴響暗泉。並稱幽致。

詩藪。高季迪風華穎邁。特過諸人。若劉誠意之清新。汪忠勤之開爽。袁海叟之峭拔。皆自成一家。足相羽翼。田按。青田明初大家。安可屈爲羽翼。其論忠勤海叟。品次殊尤。忠勤七律。風格高騫。詩綜不錄。茲體特登之。以補其缺。

### 廣陵懷舊

宮柳陰陰鎖汴橋。煖摧晴綠上蘭橈。花迎后土依然在。人去東風不可招。紫陌漸稀春試馬。青樓殊絕夜吹簫。回看烽火連雲起。應使江淹笑寂寥。

### 過胥江寄鄭參政

浦口潮來穩放船。汀花如雪草如煙。幾家茅屋緣江水。一路松風響杜鵑。簾捲輕寒中酒日。香焚新霽熟梅天。少陵心事誰能識。白首相知有鄭虔。

別劉希敬

與君同理揚州棹。臥看長天入翠微。何事杜陵傷遠別。不如范蠡賦東歸。春風小店梨花發。宿雨疎林燕子飛。惆悵臨溪一杯酒。鑾江江上日暉暉。

夜泊昌邑逢程照磨

兩年不見程廣陵。一見照人眉宇青。念亂每嗟魚雁隔。談詩還許蛟龍聽。白門酒好不易得。昌邑山多曾屢經。夜分舟子忽長往。令我相憶愁難醒。

陶安十首

安字主敬。當塗人。元舉人。爲明道安節書院山長。太祖渡江。率衆奉迎。拜左司員外郎。出爲黃州知府。坐事謫桐城知縣。遷饒州知府。吳元年。入爲翰林學士。洪武元年。命知制誥。兼修國史。尋遷江西參政。卒。贈姑孰郡公。追諡文憲。有辭達。知新。江行。黃岡。鶴渚。諸臺。合爲文集二十卷。

田按主敬初謁太祖。首陳王畧。不殺人。不虜掠。首取金陵。以圖王業。有諸葛君。王景畧一輩氣象。詩亦清勁。不愧雅音。

次韻劉彥炳典籤

英雄逐秦鹿。諸兵日相侵。義師獨縞素。感動天下心。三傑功名顯。亞父終陸沈。時方求善策。不計陳平金。孤桐倚絕壁。長養材質奇。截爲焦尾琴。奏成白雪辭。儻非爨下聲。知者復誰其。物固有佳遇。待時何足悲。

當門小山

山腳踏墻頭。全身盡呈露。殆類知己人。豁達吐心腑。晚來白霧起。對面不得覩。獨坐虛檐下。惆悵失佳侶。

野叟爲樞史李仲仁作

避世潛山野。輸君隱市朝。行年今欲老。大朴未全消。竹屋觀晴嶂。茶鐺煮午潮。獻芹心正切。未得友漁樵。

遷客

遷客辭金馬。吟情動草堂。公餘秋煮鱖。夢覺夜聞鶩。靜挂看山笏。清焚讀易香。江湖蹤迹遠。何以報君王。

三湖

三澤茫茫一碧連。白蘋風起棹歌傳。樹頭煙浪浮沈日。水底星河上下天。葦長新沙留雁夢。草鯉斷磧溼蛟涎。何當結屋瓊瑤窟。買取臨隄三頃田。

江東道院卽太平府治

福地渾無案牘塵。黃堂清靜控江津。仙凡只隔門前水。僚吏常如物外人。衙鼓晴敲琪樹曉。戟香煖透碧桃春。政平訟簡恩波遠。勝讀黃庭禮玉晨。

泊江州

江雲紺綠夕陽邊。江水空明海氣連。一點遠帆如白鳥。數聲急鼓隔蒼煙。潯陽九派疑無地。廬阜千峰直造天。清夜開尊醉司馬。琵琶亭下月當船。

權陽官舍

草木重圍路不知。故藏餘暑得秋遲。風驚野竹起黃雀。日下晚山聞畫眉。久客未成歸去計。累官更覺老來癡。庭松相間榆槐綠。暫展繩床坐片時。

李楊河

順風帆過李楊河。河北平磯沒淺波。快撥輕舟絕江去。大龍山遠小如螺。

朱升一首

升字允升。休甯人。元舉人。爲池州學正。太祖下徽州。以薦召對稱旨。吳元年授侍講學士。知制誥。同修國史。尋進學士。洪武初請老歸。有楓林集十二卷。

田按太祖下徽州。聞允升名訪之。允升進三策。太祖大悅。命預帷幄密議。所居梅花初月樓。親灑宸翰榜焉。允升由金陵還山。諸公爲賦梅花初月樓詩餞行。允升作長歌答之。厥後允升子同。以文學世其家。張來儀復爲作梅花初月樓歌云。吾聞仙人好樓居。乃在閩風之圃。元洲之墟。雲窗霧閣千仞表。青天十二金芙蓉。風舟不可以運度。安能跨海騎鯨魚。新安先生列仙儒。卜居牛生茅未誅。曉攜青鹿向煙霧。一徑初入千縈紆。桃源忽向眼中見。風物但是秦人餘。五丁何年斧鑿樞。洞戶夾立守平

紛紛過客不敢有。山君守護煩呵噓。先生結樓萬木杪。迴如麗譙雄且孤。連峯忽斷西南隅。開樓見月蛾眉初。梅花千樹雪不如。飛簷醉月弄花影。炯然身墮白玉壺。侍郎結髮讀父書。十年閉樓山不看。一朝徵起青雲衢。佩玉日向君門趨。樓前梅花自開落。樓頭明月還盈虛。南窗孤獨照歸夢。覺來枕席非吾廬。且當致身佐唐虞。變龍豈容混樵漁。長干美酒熱可沽。梅花如雪覆綠蕪。神州月色天下殊。何用區區懷故都。花間臥月紅氍毹。人生花月何處無。允升嘗編類選小詩。始漢魏終晚唐。分三十八體。門目瑣碎。頗爲識者所譏。楓林集錄詩不多。頗襲擊壤餘派。摘其佳聯。如酒盡一尊山意晚。舟行六月水風涼。松葉亂雲孤嶂暝。杏花疏雨晚窗寒。未嘗不清脆可誦也。

### 行樞密院判官鄧公勳德頌

歲辛卯。淮西兵起。明年。自蘄渡江者。蹂饒陷徽。江東大擾。至于丁酉六月之間。勝負相尋。徽民受兵者。凡十有二次。而猶不知所終也。于是泗水鄧公奉江南省平章朱公命。由宣取徽。先聲所至。不戮一人。郡邑以定。公淑德夙成。威信昭著。始至郡。立城堡。作廬舍。旬日竣事。而民不知有役。納降附下。條教村疇。帖服而民不知有軍。分兵戍諸縣。掄才以官治之。軍民有職。上下相維。遺黎乃知免矣。將官張思總。戍休甯縣。能宣布公之德美。以福其民庶。又請邑士朱升。作頌以傳之。頌曰。徽之爲郡。介乎萬山。昔有革代。招附以安。曩歲淮兵。渡江窺浙。直搗于徽。肆其燔劫。突來薦至。奔北相仍。六勝六負。哀哉民生。猶與辨章。秣陵開省。勳業崇崇。紀綱井井。旣克宛陵。南復楚彊。有獻于公。請事徽方。公曰噫嘻。無窮于遠。蕞爾山城。其邊三面。策者曰否。彼鄰杭封。全有三關。浙右囊中。公曰噫嘻。茲爲重役。

總率招徠。必資淑德。曰鄧友德。蘭苗其芽。汝父汝兄。致命邦家。宣衆未降。長鎗餘黨。旣屯于徽。懼殘彼壤。事有機速。爲我南行。汝親吾養。汝家吾承。鄧公曰唯。惟辨章令。辨章之心。徽人之命。爰敕渠帥。卽日啓行。衙兵之胡。新附之湯。江淮之雄。苗獍之銳。列騎聯旗。兩州相綴。惟徽厭亂。城郭久空。諸軍畢入。誅其萊蓬。旣柵旣城。以營以室。將士分功。成之旬日。乃納降附。漿酒溫存。受其雞豚。爲之饗飧。使觀其軍。使行其壘。意氣包涵。家人笑語。民曰此軍。與吾爲儕。曩者轢我。今吾服懷。士曰此軍。非曩之匹。闔幕衣冠。中原典則。曩之來者。驅民爲兵。何爲強弱。徒殲厥生。曩之來者。每事報復。指摘吹求。熾然荼毒。今茲下令。軍民判然。不教之衆。奔北之先。今茲下令。新自今日。無長驍風。酷爲指揮。流離還定。漸復其初。里有耕桑。家有詩書。凡此之功。在於鎮靜。萬喙同聲。歸功于鄧。鎮靜之道。制勝之規。謝公指顧。秦敗淮淝。鎮靜之道。致治之式。曹師蓋公。民以甯一。繫公懿質。辨章登之。進之于學。玉而成之。雲臺元功。少年杖策。人謂我公。今之高密。以究勞績。以開隆平。秉心勿替。引我民生。徽民願公。祝我眉壽。仰彼昊蒼。夕昕稽首。戍將承德。請作詩章。刻之縣齋。以傳無疆。

田按友德卽衛國公鄧愈也。初名友德。太祖賜名愈。年十六領軍事。史稱兵興諸將。早貴未有如愈與李文忠者。愈善撫降附。所至得人心。此頌蓋其移鎮宣州。以兵取休甯。績溪。徽州。時作也。節制之師。撫綏之策。將率得人心如此。有明造邦之烈。於是覲之矣。

孫炎一首

炎字伯融。句容人。太祖下集慶。辟行省掾。擢池州同知。尋進知府。以行省都事。總制處州。苗將叛。被擒。罵賊死。追贈丹陽縣男。諡忠愍。有左司集四卷。

錢謙益列朝詩集。伯融長六尺餘。面黑如鐵。一足偏跛。長于歌詩。至正中天台丁復。同郡夏燧。皆以詩名。日夜相切劘。下筆快。掃。百紙可立盡。常與燧對飲賦詩。務出奇相勝。每得一篇語。搥案大呼。譁聲撼四鄰。

田按汪忠勤過叢山關。觀孫炎題壁詩云。空翠深深嘖竹雞。叢山塞口日沈西。數行大字光如漆。知是孫炎醉後題。可以想其豪宕之氣。

寶劍歌

寶劍光耿耿。佩之可以當一龍。直是陰山太古雪。爲誰結此青芙蓉。明珠爲寶錦爲帶。三尺枯蛟出冰海。自從虎革裹干戈。飛入芒碭育光彩。青田劉郎漢諸孫。傳家惟有此物存。匣中千年睡不醒。白帝血染桃花痕。山童神全眼如日。時見蜿蜒走虛室。我逢龍精不敢彈。正氣直貫青天寒。還君持之獻明主。若歲大旱爲霖雨。

列朝詩集。伯融在處時。以上命招致劉誠意。劉堅不肯出。以寶劍遺伯融。伯融作詩。以寶劍當獻天子。人臣不敢私封還之。劉無以答。乃逡巡就見。

田按此集。凡詩綜所採者。皆不錄。若有事可紀。不嫌複出。

鮑恂五首

恂字中孚。崇德人。元季進士。授平江教授。薦入翰林不就。洪武四年會試。充考試官。十五年詔徵耆儒入見。命爲文華殿大學士。固辭放歸。有西溪漫稿。

朱彝尊至正庚辛倡和集補傳。中孚元統間三領浙元。至正甲申。至元癸巳。皆入闈校士。卜居郡之西溪。耕桑自樂。自號環中老人。明洪武中。賜敕放還。與貝清江。程柳莊。結社講道。學者稱西溪先生。

沈季友橋李詩繫楊鐵崖至嘉禾。且廷臣以書幣乞吳越兩山亭志。并選諸詞人題詠。楊卽爲命筆。稿將就。夜已過半。俄門外有剝啄聲。啓視。則皆嘉禾不能詩者也。率人人持金繒。乞留選其詩。楊笑曰。生平三尺法。亦有時以情少借。若詩文則心欲借。眼不從心。未嘗敢欺當世。遂運筆批選。止取鮑恂。張翬。顧文弈。金綱四首。謂諸人曰。四詩猶爲彼善於此。諸什尙須脫胎耳。然被選者無一人在。諸人相目驚駭。固乞寬假。得與姓名。至有涕泣長跪者。俱揮出門外。閉關藏燭。曰。風雅埽地矣。

亂後南湖詩會得南字

舊業帶郊牧。受時勤耕蠶。傾筐董機女。負耒責諸男。得酒共慰勞。中堂相與酣。醉從草窗裏。遠看函山嵐。交遊恨闊絕。引領望東南。瞥見穿雲燧。惶駭憂何堪。孤帆川上來。問之且再三。爲言脫巾呼。大亂由凶貪。燒城但餘堞。流血瀦爲潭。懷我同心彥。驚淚□不含。何圖共明魄。相對重高談。

景德寺詩會得過字

凌晨訪古刹。幽氣集林阿。雕甍旭日眩。紺宇晴雲摩。疎松奏竽笙。修竹鳴珮珂。禪友素所識。名流喜來過。



俯澗漱寒溜。陟磴捫翠蘿。淪茗佐芳醕。玄談間商歌。遂令塵土懷。如濯清冷波。斯景豈常遇。追遊亦無多。流光逐奔瀾。飛翼援高柯。賦詩留苔壁。千載期不磨。

田按至正庚辛詩會再與者二人徐大章與仲孚也。

### 次韻贈李煥章

輟棹駕湖曲。題詩竹寺幽。濟時心事在。爲客歲時流。逸氣橫空阜。閒情汛洛鷗。聊歌白石爛。或可慰淹留。

### 題趙彥徵畫

昔在茗花溪上往。遶溪山色滿高樓。別來十載看圖畫。山自青青我白頭。吳興孫子多才俊。曾把文章動九關。歸到江南塵滿眼。忍將情事寫青山。

### 宋訥十一首

訥字仲敏。滑縣人。元進士。官鹽山知縣。洪武六年。應聘爲北平考官。十三年徵爲國子助教。遷翰林學士。文淵閣大學士。改國子祭酒。卒。正德中追諡文恪。有西隱集十卷。

四庫總目。訥領成均胄子之任。師道嚴正。爲一時代型。文章亦渾厚醇雅。其奉敕製太學碑。極爲太祖所賞。今具在集中。又有壬子歲考試秋闈。次北平詩。及秋闈卽事諸詩。壬子乃洪武六年。蓋訥未仕之前。已應聘爲北平考官。而本傳墓誌均未之載。其過元故宮詩十九首。尤纏綿悱惻。有風人忠厚之遺。

田按劉三吾撰訥墓誌。稱所著西隱集十七卷。明史藝文志。黃虞稷千頃堂書目。俱作十卷。今所傳本。及四庫著錄本。均十卷。

其非足本，抑或爲後人改并，未可知矣。

題滑州吏目張文質所藏鮑節判見贈吳興唐子華畫雲山小景圖

君不見夏圭昔寫漁村春霧時，江山半入無聲詩。又不見馬麟昔作關山秋色圖，千里風煙來座隅。夏圭馬麟去已遠，一入九原呼不返。只今畫者亂如麻，吳興近數唐子華。子華非夏亦非馬，得意雲山自揮洒。一幅生絹不滿尺，平遠高深生筆下。恍如坐我武夷山，主人見客開柴關。幽蹊曲徑歸路迷，白雲引出青松間。又如坐我瀟湘側，漁子艤舟來逐客。水邊籬落自成村，佇望九疑江樹隔。隔岸人家茅蓋亭，過橋二老指山青。飛泉絡層石，古木挂寒藤。晴窗忽看不似畫，霏丹凝翠疑天生。相對融心神，頓覺塵夢醒。疏懶胷中有邱壑，得此珍藏作清樂。平生寓賞不留意，一朝笑贈芙蓉幙。芙蓉幙底風流賓，高堂挂壁無紅塵。公餘把酒自怡悅，便是雲山圖上人。

壬子秋過故宮

離宮別館樹森森，秋色荒寒上苑深。北塞君臣方駐足，中原將帥已離心。興隆有館鸞笙歇，劈正無官玉斧沈。落日凭高望燕薊，黃金台上棘如林。

陶宗儀南村輟耕錄：興隆筓在大明殿下，其制植梁管于柔韋，以象大匏土鼓。二韋橐，按其管則簧鳴，篋首爲二孔雀，笙鳴機動，則應而舞。凡燕會之日，此笙一鳴，樂樂皆作。笙止樂亦止，劈正斧以蒼水玉碾造，高二尺有奇，廣半之，徧地文藻粲然。或曰：自殿時流傳至今者，如天子登極，正旦天壽節，御大明殿會朝時，則一人執之，立於陛下酒海之前，蓋所以正人，不正之意。

禁路隨人不忍行。臨風立馬倍傷情。千年王室山河壯。萬里宮車社稷輕。金鼎夔龍興聖殿。紫駝部落受降城。憑誰爲問天魔女。唱得陳宮玉樹聲。

萬國朝宗拜紫宸。于今誰望屬車塵。名聞少室徵奇士。驛斷高麗進美人。朝會寶燈沈轉漏。授時玉歷罷頒春。街頭野服儒冠老。曾是花塲視草臣。

六宮春色一宵殘。夷難何人策治安。去國登瀛唐學士。降城執戟漢材官。瑤宮有扇捐金雀。紫塞無旗捲角端。花柳亦知宮女散。粧紅翠翠簇金鸞。

黃葉西風海子橋。橋頭行客弔前朝。鳳凰城改佳遊歇。龍虎臺荒土氣消。十六天魔金屋貯。八千霜塞玉鞭搖。不知亡國瀟溝水。依舊東風接海潮。

萬年海岳作金湯。一望淒然感恨長。禾黍秋風周洛邑。山河殘照漢咸陽。上林春去宮花落。金水霜來御柳黃。虎衛龍墀人不見。戍兵騎馬出蕭牆。

清寧宮殿閉殘花。塵世回頭換物華。寶鼎百年歸漢室。錦帆千古似隋家。後宮鸞鏡投江渚。北狩龍旗沒塞沙。想見扶蘇城上月。照人清淚落胡笳。

瑤臺瓊室倚清虛。佳氣潛消諫疏疎。帥閫有兵空虎衛。經筵無講逐鸞輿。侯封一代皇孫爵。帝紀千年太史書。斜日五雲坊下路。老儒騎馬重躊躇。

柳亭詩話洪武三年庚申君徂于沙漠詔謚曰順帝是年獲其孫買的里八剌封爲崇禮侯宋文恪過故宮詩侯封一代皇孫  
爵帝紀千年太史書指其事也

黼座簪裳列俊髦禁闈環珮立仙曹兩京臺閣工輸巧四海塗泥赤子勞  
端本有書遺鶴禁宣文無客進龍韜拂郎天馬空踰海不駕朝元玉輅高

雲霄宮闕錦山川不在穹廡幃幙前螢燭夜遊隋苑圃羊車春醉晉嬋娟  
翠華去國三千里玉璽傳家四十年今日消沈何處問居庸關外草連天

張以甯十首

以甯字志道古田人元進士官翰林學士入明復授侍講學士出使安南還道卒有翠屏臺淮南  
臺南歸紀行安南紀行集

何喬遠閩書學士奉使安南御製詩送之北還道卒學士亮直通敏廉謹自將臨終口占曰覆身惟有黔婁被垂囊都無陸賈  
金

徐渤筆精淮西闔帥夏貴以至元丙子附元授中書左丞至己卯薨有弔以詩曰自古誰不死惜君遲四年問君今日死何似  
四年前元學士古田張以甯以洪武二年徵爲原官四年卒與夏貴略相似

列朝詩集國初詩派西江則劉泰和崧閩中則張古田志道泰和以雅正標宗古田以雄麗樹幟江西之派中降而歸東里步  
趨臺閣其流也卑亢而不振閩中之派旁出而宗膳部規模唐音其流也膚弱而無理

王士禎古詩選有明一代作者衆多七言長句在明初則高季迪張志道劉子高爲最後則李賓之至何李學杜厭諸家之坦

遊獨子沈鬱頓挫處用意。雖一變前人。號稱復古。而同源異派。實皆以杜氏爲崑崙墟。

汪端明三十家詩選。志道七古骨力遒健。才氣排宕。發源杜陵。出入遺山道園之間。可以獨張一軍。

田按志道八歲賦琴堂詩。釋伯父子獄。史稱其與朱升秦裕伯等。扈從擁翠亭。給筆札賦詩。可謂榮幸。翠屏一集。咀含英華。當爲閩詩一代開先。二藍十子皆在下風。

### 峨眉亭

白酒雙銀瓶。獨酌峨眉亭。不見謫仙人。但見三山青。秋色淮上來。蒼然滿雲汀。欲持五十絃。彈與蛟龍聽。

### 送重峯阮子敬南還

君家重峯下。我家大溪頭。君家門前水。我家門前流。我行久別家。思憶故鄉水。況乃一作何況故鄉人。相見六千里。十年在揚州。五年在京城。不見故鄉人。見君難爲情。見君情尙爾。別君奈何許。送君遽不堪。憶君良獨苦。君歸過江上。爲問水中魚。別時魚尾赤。別後今何如。

靜志居詩話。承旨重峰送別一篇。仿太白。可稱合作。李方伯楨題雙燕圖寄人詩云。君家吟谿北。我家郡北西。君家梁間燕。我家梁間雁。周尙書枕送人詩云。我家白沙渚。君家桐江頭。我家門前水。亦向桐江流。當皆從此出。可知是作膾炙當時。

### 題米元暉山水

高堂曉起山水入。古色慘淡神靈集。望中冥冥雲氣深。祇恐春衣坐來溼。江風吹雨百花飛。早晚持竿吾得歸。身在江南圖畫裏。令人卻憶米元暉。

登大佛嶺雨中雲在其下

大佛嶺盡小石來。黑崖削鐵懸崔嵬。泉翻松根六月雪。雨老石路千年苔。我行忽落青天外。白雲四望茫如海。黛痕三點見蓬萊。明星玉女遙相待。九華天姥當見之。人間有山無此奇。平生酷恨李太白。不到閩山獨欠詩。

湛淵王提點招飲出示座主馬中丞詩歸賦此謝之

石田仙人玉爲節。繡衣秋映琪花雪。袖揮驪珠五十六。飛到淮南是明月。淮南高士王方平。雙騎蒼鹿吹瑤笙。臥看明月在窗戶。桂樹雲影秋冥冥。昔我乘槎斗邊去。親飲仙人玉杯露。丹成一別三十秋。東望元洲隔煙霧。手攀桂樹白髮新。方平觴我脯麒麟。飲酣語舊逸興發。笑傲滄海生微塵。金雞呼日扶桑曉。三山如黛潮聲小。明當握手共掀髯。日觀層巔一長嘯。

閩關水吟

閩關之水來隴頭。排山下與閩溪流。閩溪送客東南走。直到嵩溪始分手。客居溪上雲幾重。烏虓月出門前松。天風吹雲數千里。飄飄直渡長江水。清淮浩蕩連黃河。碧樹滿地黃雲多。夢中長記關山路。隴水潺湲似人語。覺來有書不得將。海潮不上嵩溪陽。平原春晚生芳草。杜鵑聲裏令人老。行人歸來動十年。潺湲隴水聲依然。安得湘絃寫嗚咽。彈作相思寄明月。

長江萬里圖爲同年汪華玉賦

溲州太守吾同年。香凝畫戟春風前。談詩虛幌坐白晝。忽見浩蕩萬里之江天。天開地闢鴻濛外。風迴日動神靈會。蓉旗翠節下葳蕤。陰火明珠出光怪。西山雪水青霄來。豁然峽斷長川開。洞庭浪闊秋蕩漾。漢陽樹遠雲徘徊。廬阜迢遙到牛渚。複渚重州散平楚。布帆漠漠瓜步煙。紅葉翩翩石城雨。山菴似聽疏鐘鳴。野橋疑有行人行。村墟微茫灌木暗。絕境毫末俱分明。旅榜前頭更漁艇。萬鷺千鴉動寒影。水窮霞盡已欲無。猶是海門秋萬頃。野人興發滄洲間。欲呼艇子吾東還。熟看乃是雲巢畫。巧奪神力迴天慳。太守邀我題小草。上有仙人虞閣老。開圖歡喜悲忽來。令我有句不能到。仙人昔欲三神遊。我居三神海上頭。成連携我鼓琴處。白浪如山龍出遊。夜夢從之看浴日。十洲青山洪波赤。仙人教讀新宮銘。酒醒扶桑露華白。小小桂樹淮之洲。雁影幾度空江秋。嗚呼仙人不可見。太守與我心悠悠。

題劉君濟青山白雲圖

野性夙所忻。青山無垢氛。落花一夜雨。幽樹滿川雲。鹿迹閒行見。松香獨坐聞。殷勤招白鶴。予亦離人羣。

國雅張志道境入清頓。未脫夙武。如野煙喬木晚。江雨落花深。鹿迹閒行見。松香獨坐聞。鳥影似猶見。猿聲疑或聞。此例思深且幽。非元調也。

嚴子陵釣臺

故人已乘赤龍去。君獨羊裘釣月明。魯國高名懸宇宙。漢家小吏待公卿。天迴御榻星辰動。人去空臺山水清。我欲長竿數千尺。坐來東海看潮生。

沈德潛明詩別裁。明人咏嚴陵者。以此章爲最。

焦磯廟題壁

碧殿紅樺翠浪間。江風縹緲動煙鬟。神雞不逐雲中去。唬殺清秋月滿山。

謝肇淛小草齋詩話。張以甯以元學士入明。嘗過焦磯廟。題詩壁上云云。後再過之。有人改其末句云。神雞忍逐他人去。羞殺清秋月滿山。以甯大慚。刮去其詩。



